

東
華
續
錄

東華續錄

光緒九十四

臣朱壽朋敬編

臣汪錫增恭校

三月丙午朔頒給新民廳 巨流河神廟 柳河神廟匾額○命曾紀澤管理同文館事務○命翰林院侍講崔國因充出使美國兼日國秘國欽差大臣○丁未以吳鳳柱爲湖南綏靖鎮總兵○綢宣奏請查內務府案卷內載 太廟恭奉 冊 寶共六十四分 敬典閣上層尊藏 玉牒黃檔紅檔共二百四十包 寶十顆 敬典閣下層尊藏 玉牒黃檔紅檔共一百包 崇謨閣尊藏 寶錄一千五百一十三包 聖訓三百八十包 寶錄圖一匣 奴才敬謹瞻仰供奉尊藏均屬妥協惟 敬典閣上層供奉十代聖容十箱 行樂圖四箱 奴才未敢擅啟謹於秋分節後擇吉恭晾時敬謹叩瞻又恭存 列祖列宗所遺 御用鞍轡弓箭腰刀鎗劍鑾轡 高宗純皇帝 御用朝冠朝珠朝帶袍褂鞍轡鎗劍腰刀準捷鎗撒袋弓箭 宣宗成皇帝 御筆字挂屏鞍轡威禽鎗木桿鎗銀式件樺木鞘小刀火鑪火紙筒 文宗顯皇帝 御用鞍一付籐鞭一把撒袋一付弓四張箭三十六枝 穆宗毅皇帝 御用鞍一付籐鞭一把弓三張箭二十枝

撤袋一付等項奴才敬謹瞻仰妥爲覈藏及各 宮殿陳設一切金玉銅瓷物件金銀金條銀鏤書籍字
畫冊頁併收存綢緞紗呢羽緞及 文淵閣收存書籍各等項按照印冊逐一詳細查點俱各相符奴才
均嚴飭該管官役人等敬謹小心看守仍不時敬謹稽查以昭慎重報聞○已酉剛毅奏大同鎮總兵林
成興暫緩交卸得 旨林成興著照所請暫緩來京黃金志現在天津著該撫咨行李鴻章飭令該總兵
卽赴新任○庚戌 上詣 奉先殿 壽皇殿行禮○以捐助賑賑賞給奉天營口資善堂匾額○諭卞
寶第劉銘傳林維源奏全臺生番一律歸化逆首就擒請將出力人員獎勵各摺片臺灣各路呂家望等
番社貢嶋梗化劉銘傳督率官軍剿撫兼施逆首劉添汪拿獲懲辦現在全臺生番一律歸化仍著該撫
等將撫番開墾事宜妥爲辦理以靖疆圉所有尤爲出力之副將林福昌著以總兵記名簡放都司鄒有
勳等均著免補參將游擊以副將儘先補用鄒有勳並賞加勇巴圖魯名號劉朝帶並賞加奮勇巴圖
魯名號黃定國著免補都司以游擊儘先補用千總戎勝標等均著以守備留於福建儘先補用並賞戴
花翎已革通判王維敘著開復原官並免繳捐復銀兩縣丞陸承謙著免補本班以知縣仍留原省補用
其歷年剿撫各軍出力員弁並各局撫墾委員准其擇尤彙保毋許冒濫另片奏彰化嘉義紳士保衛鄉
里緝匪弭患懇請獎敘等語郎中蔡占楫著賞加道銜主事林啟東著賞加五品銜該二員均賞戴花翎

以示鼓勵該部知道○辛亥祀 先農壇行耕藉禮○岑毓英奏查明武定州古黑等村寨被擾請豁免錢糧下戶部議奏○以熱河苑丞五福五岱毓純潛運倉米交熱河都統訊辦正總管錫麟副總管徵麟失察交總管內務府衙門議處○壬子以徐致祥爲宗人府府丞○甲寅劉錦棠奏補用知州嚴先禮膺大宴爲請飭革職得 旨如所請行○升奏 奴才於光緒十五年正月十七日接准總理各國事務衙門密函遞回藏哲鄂博圖卷並鈔寄出使英國大臣劉瑞芬原函及英西條約等件 奴才前在對邦會談時曾向印使索要印哲條約印使只出英字相示並無夷文哲孟雄親族又堅言並未與英人立約無從知其真僞今得鈔寄密件庶臨事更有把握敢不懷遵迭次 諭旨盡力籌維期於早弭邊事惟藏人生性固執必欲哲孟雄一切照舊該藏番不願與洋人接壤務須問一哲孟雄於中乃可定界 奴才查雅納支木兩山藏哲本有疆界惟近來商販往來之哨利係屬新闢捷徑西人所謂熱勒巴拉嶺卽係此山上年西藏糧務周添等曾於此山立界以阻洋人又木且稟定案以致藏人越界修卡釀此邊患辦理實屬荒謬今擬在熱勒巴拉嶺卽哨利山立石劃分藏哲之界以符前案其印哲之界係在日喜曲河仍應照舊在條約註明且查印哲立約係在咸豐十一年彼時印度豈不知哲爲我屬定約之後並未准印督照會案今以中英敦睦決不因以小部稍涉齟齬惟哲孟雄部長土桑朗結本屬愚懦無能受制於下其

頭目有頗噶喇嘛康薩卓尼二人狼狽爲奸印藏交綏皆由此二人唆弄所致刻下哲孟雄部長卽印度所轄西金王者近被英官囚於噶倫綑而其母及子尙居藏屬春丕地方卽英使所謂印兵追入微舉山盆蓋微舉春丕音相近也近日印營復假作部長手摺取其兩子前赴噶倫綑部長之母堅執不放攜其兩孫屢來奴才行營哭訴求爲作主藏番尤爲忿恨不平奴才已嚴飭藏番不得肆行干預然英人意在更易部長非尋常地方事宜可比奴才亦擬俟赫政到後囑其婉勸英官萬不可將哲王稍有更易否則卽非照舊恐藏番有所藉詞邊事不易寧恩是爲定界中之一大關鍵也至於藏兵已分四起陸續提營惟帕隘之雪正與對邦相等行者不僅沒脛各處烏拉不齊是以驟難撤盡而洋人全軍未動藏番終有戒心但已據迭次回稱必當遵旨速籌遣撤當不至再有越界滋事之虞又洋人要求通商一事經委員等迭次設法開導藏番執歐格納獨有領邊界通商之語矢口不移又復自計勸諭費盡氣力始允在對邦一帶通商惟其地非係藏界既未審英人能否聽從且地在喜瑪來山脊氣候奇冷積雪太深通商殊非善地已諭令另覓一區以便於分派漢番員弁設關徵稅已飭委著噶布倫伊昌批冲回藏與第穆熟商一切取其大眾圖記遵結到營奴才再與英官會晤定議該大眾僧俗能否不有異詞俟接到稟覆容再奏陳此又折回仁進岡開導藏番籌辦定界撤兵通商之情形也至仁進岡地方自去歲十二月二

十九日夜風雪大作平地雪深數尺各山尤爲深厚新正初九日赫政專人由獨脊嶺僱募哲孟雄人持函撲雪來營知赫政已於客歲十二月二十九日到獨脊嶺特致函奴才是否約彼先到營中抑在對邦洋營候晤奴才當卽函囑赫政先行來營並派弁赴獨脊嶺促其速至詎時甫孟春連日雷電交作大雪仍復不止專弁數次折回復派兵數百修路而旋修旋積人力難施多方設法去弁僅帶兩人得以過山近日又復大雪較前更甚赫政必驟難前來奴才惟有俟赫政到後趕緊設法會晤英官定議邊事勿敢稍涉宕延惟現在邊事正當得手哲界事宜可否仰懇 天恩飭下總理各國事務衙門熟商英使華爾身轉電印督務將哲事照舊更不可將哲孟雄部長稍有更易以免藏番疑慮有所藉詞緣藏番允從仍照近年向章彼時已非易事奴才於出藏奏報卽已陳明瞭在 聖明洞鑒也下該衙門知之○丁巳祀先蠶壇 皇后行親桑禮○戊午前任杭州將軍古尼音布卒賜卹如例○前任禮部尙書畢道遠卒卹陸如例○頒給綏遠城 關帝廟 城隍廟 龍神廟匾額○己未 上御中和殿看奏書畢詣 寧宮進香行禮○命親王等祭告 天 地 太廟 社 稷○予鹽城縣烈婦李蕭氏旌表○綏遠城將軍克駿額等奏請加給綏遠城將軍歸化城副都統津貼銀兩以資辦公下戶部議奏尋戶部覆奏查該將軍副都統歲支俸廉例有定數豈容輕議加增況當此中外庫儲莫不異常支絀倘各處紛紛援請

勢必難以爲繼礙難照准得 旨如所議行○黃彭年奏吳中以水利爲第一要務從前屢經修濬近來

復多淤塞上年旱災凡水泉可通之處厚畝得收成其去水太遠之區禾黍黃槁是其明證然旱

年失水爲害尙輕設遇潦漲無從宣洩則爲害更大查小河支港業經遵照向章責成州縣就地籌濬至

經流幹河需款較巨籌辦維艱臣擬委員查勘各經流亟應修治之處俟賑務完竣核計尙有餘款擇要

興修期於國計民生實資裨益報聞○庚申 上御太和殿閱視 冊 寶畢詣 慈寧宮恭上 慈禧

端佑康頤昭豫莊誠壽恭皇太后徽號曰 慈禧端佑康頤昭豫莊誠壽恭欽獻皇太后○辛酉頒詔天

下覃恩有差○賞恭請 冊 寶執役校尉等銀兩○諭御前大臣奏查參工部堂司各官工部查明

檢舉各一摺本月十四日慈寧門外應行支搭黃幄金殿該部理宜妥爲預備何以屆時竟未備齊實屬

不成事體承辦司員著查取職名交部議處該部堂官著一併議處○壬戌寶安奏文職無論正佐皆有

辦事之責若文理不通既難繁舉友賢否又易受弄吏欺朦弊端曷可勝言雖經奏明凡非正途出身到

省時均由督撫考試憑文雅優劣以取等第俾在官者無不通文奴才所慮者一在考試不認真一在考

試不得法所謂不認真者名爲屬試上司每於出題後即行退堂均俟試卷交齊彙總呈入雖云曾經面

試其中代倩傳遞皆所不免若論真才未可知也所謂不得法者閱卷時或寫書法或重詞華居然場屋

光景若論吏才未必得也此其弊一失於無實而沽名一失於逐末而忘本誠恐吏治之才吳山表蕩相應請 旨飭下各省督撫於分發人員到省之初不得預定考期每遇公事輕簡之日立傳該員應試限以三四員爲一次上司在座號桌分列左右一經出題禁止接談出入面試有交卷者先取公事一件令伊讀之聽其句讀再指公事某段令伊講解此刻問是否文理通曉無難立見然後評各卷以定優劣至於文筆生熟字跡工拙似不必深論此特指面考一時而言之也繼其後者該督撫仍須勤於接見久勿憚煩每以吏治民情察其誠見如是考試嚴既非虛事接見密可識貢才不專於文卷求之則吏治當更有起色矣又奏請 飭下各督撫遇有保舉之案仍照定章隨案造具履歷送部不准聲明補送其改獎之案應予以限期併請 飭部酌定 上諭御史寶安奏分省試用人員請嚴定考試章程及各省勞績保舉之案應令隨案造送履歷並酌定改獎限期各摺片著吏部議奏○卞寶第奏查省新案交代仿照山東新章按半年開報下戶部知之○予故廣西道員易元泰交部照軍營立功後病故例議卹○癸亥以田國俊爲貴州按察使○以鳳陽府知府趙舒翹補賑賞戴花翎○內寅景善因病請解任允之○李鴻章奏直境糧缺價昂懇 飭下奉省將錦州一帶高粱粟米仍准販運以資接濟得 旨上年直隸收成中稔奉省被災甚重刻下錦州一帶糧石是否可以弛禁出境著直隸總督咨行署將軍定安商酌辦

理○丁卯調崇禮爲鑲紅旗滿洲副都統以鈕祜祿爲正黃旗蒙古副都統○戊辰 上詣 泰先殿

壽皇殿行禮○調敬信爲吏部右侍郎續昌爲戶部右侍郎文興爲禮部左侍郎以寶昌爲禮部右侍郎

○諭閣敬銘奏懇准回籍調理一摺閣敬銘著准其回籍並加恩賞給馳驛該大學士辦事認真深資倚

畀一俟病痊卽行來京陛見○上奉 慈禧端佑康頤昭豫莊誠壽恭欽獻皇太后幸頤和園閱水陸操

五日○以東省道員李清和搶護險工賞戴花翎○德馨奏請將虧短商款之道員程俊等斥革勒追得

旨程俊程杰程安儲均著先行斥革程俊並拔去花翎該部知道○己巳予故鳳鎮六泗道任蘭生附

祀前安徽巡撫英翰祠○張之洞奏請改鑄游擊都司守備等關防條記下禮部知之○升泰奏奴才於

光緒十五年正月二十五日曾將邊界大雪連旬各山封阻密陳籌辦情形并一面飛咨劉秉璋先行電

陳在案旬日以來各山之雪仍未消融赫政亦無來信奴才日惟催促藏兵連撤並遣人查探知藏兵准

分四起提營然均在靈馬湯以上數十里之樹林內分紮帕隘本地亦有數千詢其是何居意據稱駐藏

大臣傳 大皇帝諭旨飭令撤兵我等不敢不撤惟洋人全軍未動如突來藏界朝發夕至我等不敢不

防茲蒙詰問亦不敢不以實告等語奴才竊查藏番屢構邊 旨撤兵而拔營不遠分紮深山實有暗防

洋人之意固已早窺其心前摺亦經陳明但藏兵若密伏深山難保日久英人不知轉使有所藉口是以

迭飭委員催令速撤今該藏番明明說出實意若不許以保護該番終覺懷疑將來恐不免枝節又生誠如聖諭據英使回稱藏兵不撤印兵必進斷非空言所能阻止已飭委員等明白曉諭如藏番撤後印兵復來應惟駐藏大臣是問藏使力作擔當若該番陽奉陰違以致洋人藉詞進兵則非駐藏大臣辦理不善該藏番等奉諭之後日夜聚議具稟藏中昨二月初一日呈到第穆率領閩城僧俗及大眾百姓遞具圖記印票到營據稱藏番恪遵諭旨撤兵惟以後事宜全仗駐藏大臣轉陳大皇帝嚴飭英人勿得再事欺凌我藏番實沾恩典現已飛調夫馬定於本月二十五日分起撤退復經統兵公爾噶布倫伊昂洛布汪曲呈遞定於二月二十五日遣撤萬無遲誤切結前來奴才立即摘錄稟詞備文專差設法送赴洋營文內聲明藏兵已定期撤退印兵究於何時可撤囑其移覆一面鈔錄函文底稿通知赫政囑令務取英官回覆應請飭下總理各國事務衙門詳告英使云藏番已遵旨撤兵此後印兵亦宜約期撤退現在邊界地方奴才僅留親兵六百人又緣營隨來漢兵及各房書吏並委員等所帶漢番人役統計三百餘人又車木地方百姓寥寥另留糧運人夫數百名此外並無多兵至遣撤之兵勞苦異常有遠至三四十站者奴才飭令支發局派員赴帕隘總路按其道路遠近每名酌給賞項以利遄歸各取其管帶官收領稟結備案至於界址通商兩事尚未接到商上覆稟應俟噶布倫等由藏折回到邊再行專摺

詳陳下該衙門知之○庚午頒給雲南省城 九龍池龍神及附近之 西山龍神 黑龍潭龍神 邵

甸龍神 海源寺龍神匾額○岑毓英奏同知王德誥受瘴病故請從優賜卹下部議奏○辛未賞賚光

病假十日○壬申甯夏副都統常星阿卒賜卹如例並賞銀一千兩治喪○派魁斌凱泰恩承烏拉喜崇

阿徐鼎奕年挑選各直省舉人○諭河工關係緊要應添用正途人員俾資熟習仍照嘉慶二十二年成

案將已挑一等人員兼掣東河北河分發試用○癸酉以沈源深爲都察院左副都御史○以蘇倫岱爲

甯夏副都統○諭殺虎口監督那謙奏差滿回京齎交盈餘銀兩一摺所得盈餘等項銀一萬六千六十

三兩零均交廣儲司那謙著毋庸給該衙門知道○諭著正白旗滿洲副都統明秀奏印信被竊請將

參領議處並自請議處一摺據稱本月二十三日夜間被賊盜去都統印信該旗都統伯彥訥謨帖副都

統容貞均在頤和園當差該印務參領承齡未及回明是以先由該署副都統奏參等語旗署重地何以

漫無覺察竟至印信被竊殊堪詫異印務參領承齡著先行交部議處其如何被竊情形及該參領等有

無朦混情事著伯彥訥謨帖容貞迅即查明據實具奏該署副都統自請議處之處著俟伯彥訥謨帖等

覆奏後再行降旨○甲戌修 夕月壇○諭伯彥訥謨帖等奏查明印信被竊遵旨覆陳一摺據稱正白

旗滿洲都統印信實係二十三日夜間被竊請飭嚴拿賊犯並將值班官兵分別審訊議處等語著步軍

統領衙門順天府五城御史卽將竊印人犯一體嚴拿務獲究辦所有該旗值班官兵除卽務參領承齡業經交部議處外世管佐領德容領催福增興順均著交刑部審訊騎校古綬著革去騎騎校一併交部審訊卽務參領咸春著交部議處都統伯彥訥謨副都統容貴明秀失於覺察均著交部議處餘依議○諭綿宜奏勘估 永陵啟運殿等處應修工程請擇古典修一摺著欽天監於本年四月內選擇吉期先行知照著盛京將軍會同工部侍郎屆期敬謹興修另片奏請擇吉恭移 神牌等語著一併選擇知照○是月德意志國使臣巴蘭德歸國旋回任○日斯巴尼亞國使臣羅德理歸國參贊鄂尼思嘗理○義大利國使臣盧嘉德卒賈雅第署理

夏四月丙子朔時享 太廟○陳毓奏安省停止賑捐下戶部知之○丁丑烏里雅蘇臺將軍杜嘎爾卒卹廕如例並賞銀一千兩治喪○定安奏驛站苦累請支借馬乾銀兩得 旨如所請行○剛毅奏酌改營制案內裁改官缺繕單呈覽下兵部議奏○戊寅予薛福辰病假一月○陳欽銘因病請解任允之以劉樹棠爲江蘇按察使○以托克滿爲烏里雅蘇臺將軍○諭山東連年被災收成歉薄民情困苦上年張曜奏請截留京餉銀五萬兩本年奏請由藩庫籌銀五萬兩並請飭部撥銀十萬兩作爲賑款先後降旨允准惟念該省災區甚廣現屆青黃不接小民覓食惟艱流離失所殊堪憫惻加恩截留本年輪船起

運南漕十萬石由李鴻章飭令迅速運往山東交張曜派委委員剿運被災地方及時分別散放所有運
通經費輕撥銀兩一併解往備賑該撫務當飭屬詳查災區妥籌散放以期實惠均霑毋任吏胥舞弊用
副朕加惠災黎至意○頒給湖北枝江縣 城隍神匾額○已卯額爾慶額奏請將任性妄爲之提督徐
得標革職待 旨如所請行○劉銘傳奏請立沈葆楨吳贊誠專祠下部議奏○頒給浙江杭州府 金
華將軍副匾額○庚辰以文全爲齊齊哈爾副都統○予百齡著員方寶賢旌表○劉錦棠呈進回部黃
金下該衙門知之○壬午大祀 天於 闕丘○福錕擊獲偷竊正白旗滿洲都統印信之德普柏山等
交由步軍統領衙門奏請移交刑部嚴訊按律懲辦得 旨准如所請尋以印信被犯錘碎 飭禮部另
鑄頒發○諭吳大澂倪文蔚奏邊保鄧州大工出力文武各摺片鄭工開辦以來日久事繁在工文武各
員始終奮勉出力自應給予獎敘所有單開之文職六百五十二員武職一百二十員及片奏保獎各員
均著該部議奏另片奏各省關籌解經費接濟工用請將管解經費較鉅之員獎勵等語此項鄭工用款
甚鉅雖經戶部分別指撥各該督撫監督藩運兩司關道等不分畛域籌解迅速用能克期竣事均著傳
旨嘉獎其解款較鉅之委員著吳大澂等查明擇尤請獎毋許冒濫至降調按察使陳寶箴到工既遲又
經告假所請開復處分之處著不准行○張之洞奏潮梅鹽務歷年應銷額引二十萬零五千餘道額微

正餉銀十二萬六千四百餘兩部飯銀一千八百九十餘兩均捐銅斤水脚銀九百八十餘兩爲廣東鹽課大枝向設有鹽運分司運同專司其事嘉慶二十一年以後銷路漸滯鹽經奏准展限分年帶銷道光三年以後遂至屢次奏請展緩奏銷年限自咸豐以來引地疊次被擾鹽壩窮乏卑務尤壞閩私充斥遞年引鹽不能報銷足額每屆奏銷辦理竭蹶多至七成三分而止除道光咸豐年間展限奏銷不計外同治元年起至光緒五年奏銷節次經前督臣奏請展緩限期已至五次之多而催追守提仍復艱難萬狀兼以晒價運脚悉出於官運同籌備無資勢不能不暫借官款往往致有拖欠至已革前運同錢瑄虧帑尤鉅幾成不了之局經臣奏參勒追百計督催派員代爲經理方將奏銷勉強辦至七成一分嗣後兩次委令潮州府兼署運同重以事權輕其費用復奏明行閩引地減釐節費所以設法維持者不遺餘力此兩年奏銷始能復還七成三分之數僅免拖欠公帑雖略有微效仍非長策且兼署本出一時權宜知府實在地方又不能人人皆熟鹽務斷無常令兼署鹽篆之理然使歸運同專辦則流弊更不可問歷考數十年來皆係減成奏銷雖亦有運同辦理得法仍不能有銖兩之增倘天時人事一有不齊卽必有鉅萬之短且不惟奏銷不足額而已也歷屆展緩奏銷限期初則因乎匪擾後則沿爲敷衍每屆展緩少者三月多者十一月一屆之銷數不能有加而數月之餉課已歸無著此則無形之短絀格外之取巧實使餉

課於虧之中而又有虧者也查潮橋疲累之故約有數端準商倒歇僅存空名暫招小客代辦晒運膏由官出銷數之旺歟全視乎運本之多寡官本不裕收儲不廣船戶居奇商販勒捐雖有暢銷之機會已無可售之存鹽其累一運本至少亦須五六萬金運同無論實署之員何從籌此鉅本向來辦法皆係以印票重息向商號借貸近年聞私日多鹽務利微迥非昔比追銷有贏餘僅償還欠其累二資本不敷挪用課餉正存正款藉口拖欠日久遂成侵虧其累三積重難返陋規痼習不能破除因而私行無忌愈致折閱其累四距省遼遠自爲風氣司巡衆多薪工浩大酬應紛繁虛糜浮濫其累五運同新舊交替舊任存鹽往往減價爭銷新舊兩任同致虧累其累六運同部運者人地固屬生疏委署者爲日又不能甚久幕友司事之盤踞書巡兵役之疲玩聯爲一氣牢不可破其累七積弊相沿根株難拔奏銷承無足額之期庫帑時有虧欠之患懲前慮後深切憂焦若不急思變計將並此七成三分之銷數亦且不可長恃即使日日嚴檄追呼任任撤任參革亦屬無濟此潮橋鹽務疲壞已極必須改絃更張之實在情形也督同鹽運司英啟熟籌詳議並派委員明察暗訪一切利弊現已灼然無疑必須盡破向來之成局始能挽救以後之頽綱查光緒十年准戶部通行開源節流事宜內鹽法一條云如四川督臣丁寶楨不避嫌怨一洗積弊歲入鉅款他省果能認真核實必有增益切勿觀望延宕等語是戶部極以四川改辦官運爲認

真核實又肇慶府改江廠稅務積虧多年久未足額經臣奏准改章專派委員稽徵收繳加倍具有明效
今潮橋鹽務破壞已極亟應查照部行酌採四川官運辦法仿照黃江廠稅務成案改章設局委員辦理
蓋潮橋配運行銷悉由運同自主利則歸己害則歸公消長盈虧莫可究詰若改歸委員澈底清查操縱
悉在運司本辦於官利歸於國茲擬在潮州設立官運局由運司自行督辦遴委廉幹之員前往潮橋駐
局專辦運庫雜款項下撥發運本六萬兩俾資配運凡潮橋拆引配鹽督銷完餉緝私等事均責成委員
一手經理仿照通綱章程蓋用運司三聯印照飭發領運按月截根繳查其潮屬各場官場務仍由運同
考察各場鹽壩亦照舊由運同督飭整理以廣場座而濟準銷至官運局行銷考成即開列委員銜名以
專責成其運同衙門另行於節省經費項下籌給津貼以資辦公不准稍有阻撓運本足則場鹽無慮賣
私浮費裁則成本較爲輕省設局另辦則衙門餉習一經革除委員接替則存鹽新舊不致爭售諸弊廓
清正餉自裕查有試用知縣周福昌才具精強力任勞怨歷年委辦鹽務各差俱能認真整頓著有成效
卽委該員充潮橋官運局總辦其一切詳細章程由運司隨時體察情形酌核飭辦嚴加考核竊維潮橋
鹽務疲敝積數十年此次改章滌弊於課餉必能大有起色斷不止歷屆七成三分之數如果天時人事
一切平順應手或能辦足十成奏銷亦未可知現經切飭該總辦委員周福昌極力整頓務將一切利弊

豁然呈露果能解足十成奏銷則每年可增正課三萬四千餘兩創始既有明效以後接踵辦理者皆有
成例可循斷不能聽其因仍朦混任意虧短從此常年正課可增鉅款創辦之功實非尋常出力可比查
黃江廠稅改章徵收加倍曾蒙 恩旨將創辦委員照異常勞績給獎經部議准行在案至廠稅係加增
額外節省潮橋鹽務係加增正課難易輕重尤有不同自應籲懇 恩施援照黃江廠稅成案准照異常
勞績請獎以示鼓勵出自逾格 鴻施下戶部議奏○張之洞奏粵省諸礦惟鐵為多歷年粵省所銷洋
鐵為數甚鉅必須將土鐵疏通利導既興地利亦塞漏卮前經 臣奏請開除東西兩省鐵禁變通章程暫
免釐稅裁革規費各節均經奉 旨允准通行欽遵辦理在案上年以來復經委員分赴兩省查訪鐵務
情形實力整頓據稱近來運鐵之地畛域雖除鑄鐵之爐弊累仍重是以流通匪易而出鐵不多推求其
故大爐餉稅重土爐餉稅輕私爐無稅無餉私爐有吏役地棍包庇者有官爐影射匿稅者官爐報充報
停事繁費重於是大爐漸化為土爐土爐漸化為私爐爐名愈少餉稅愈絀近來有名之規費雖禁而無
名之需索不能絕私爐之占奪不能止私爐雖無官稅必有私規又時為官爐所牽制亦不能暢所欲為
以致官爐私爐權利皆薄既不能多鑄自不能多銷且鐵爐皆係山僻故處力作貧民若必欲禁絕寬之
則虛文而無實嚴之則滋擾而不值以故雖有地利觀望仍多無益餉需徒滋中飽 臣督飭司道詳加核

釐餉欲除積弊惟有化私爲官從此盡去官爐私爐名目凡開爐座無分官私均係自食其力應聽其任便鑄鑄所有從前爐商悉行注銷官爐無須報充私爐無須隱匿不報充則無官規不隱匿則無私規擬自光緒十五年起暫將爐餉爐稅停徵三年俾其傳播鼓舞盡力鼓鑄設法開採三年限滿歸入運餉所過盤卡帶徵照數撥補約計粵省市面所銷土鐵之數以盤抵餉斷無不敷如此辦理餉稅無日減之虞胥吏失需索之柄必於餉政大有裨益查廣東爐座向有大爐土爐之分大爐每座應納爐餉銀五十兩每兩加火耗三分事隸藩司土爐每座應納爐餉銀五兩三錢每兩加平三分三釐事隸運司從前爐座尚多屢因停歇無徵迭經咨部豁除近年大爐每年共徵正耗餉銀一千三百五十九兩零二分五釐土爐每年共徵正耗餉銀三百一十二兩七錢二共應徵銀一千六百七十一兩七錢二分五釐然猶逐年短欠催繳維艱廣西所抽爐稅名目有鐵爐有土爐名目不同每座均徵爐稅銀十兩每年共完爐稅二百五十兩事隸廣西藩司合計兩省所徵之數均屬寥寥惟均係報部之款今暫予停徵其現年應完之數未便虛懸應卽照近來徵足數目廣東每年共銀一千六百七十一兩七錢二分五釐廣西每年共銀二百五十兩在兩省開款項下暫籌抵補俟將來限滿仍照上項原數在爐廠帶徵撥歸藩運兩庫抵還應徵爐款統計兩省所停爐餉爐稅爲數不及二千兩而種種無名之煩費不禁而除種種弊端一

洗而盡此後煬鑄日盛運販自通果使土鐵之鑄日旺外鐵之銷日絀官民皆饒何有於千餘金之爐餉
洵屬無煩庫款有益商民並擬設法招集商股置辦機器求鎔鍊之法仿照洋鐵鑄成各種合用料件以
期推行盡利據廣東布政使司會同兩廣鹽運司東莞務局司道廣西布政使司會同西潯金局司道具
詳前來當經咨商廣西撫臣沈秉成意見相同相應奏明辦理下戶部知之○癸未諭本日御史富亮奏
監放粥廠完竣摺內於應行據寫字未經據寫殊屬疏忽富亮胡俊章均著交部議處○諭怡親王載敦
奏因病懇請續假並開去差使一摺載敦著再賞假兩箇月毋庸開去差使○欽奉 慈禧端佑康頤昭
豫莊誠壽恭欽獻皇太后懿旨上月二十三日臨幸頤和園閱視神機營水陸各操隊伍整齊聲勢聯絡
實深嘉悅醇親王奕譞管理多年訓練精勤卓著成效著交宗人府從優議敘○諭上月二十三日朕恭
奉 慈禧端佑康頤昭豫莊誠壽恭欽獻皇太后閱看神機營水陸各操技藝精熟聲勢聯絡該大臣等
平日訓練認真深堪嘉尚所有管帶大臣慶郡王奕劻著交宗人府從優議敘都統德福扎拉豐阿副都
統熙敬容實全營翼長副都統秀吉恩佑均著交部議敘營務翼長祥善並各委員管帶官均著交總理
海軍事務衙門酌加保獎其餘各項書手兵丁等均著加恩賞銀五千兩以示鼓勵○張之洞奏本年二
月初六日承准軍機大臣字寄光緒十五年正月十五日欽奉 慈禧端佑康頤昭豫莊誠皇太后懿旨

前據總理海軍事務衙門奏請由天津至通州接修鐵路當經降旨允准嗣據御史余聯沅等先後陳奏請停辦鐵路均諭令總理海軍事務衙門會同軍機大臣妥議具奏茲據會商籌議遂欵臚陳詳加披閱所陳各節辨駁精詳敷陳剴切其於條陳各摺內似是而非之論實能剖析無遺惟事關創辦不厭求詳在廷諸臣於海防機要素未究心語多隔膜該將軍督撫等身膺疆寄辦理防務利害躬親自必請求有素著慶裕定安曾國荃卞寶第裕祿張之洞崧駿陳赫德岑毓英劉銘傳奎斌王文韶黃彭年按切時勢各抒所見迅速覆奏用備採擇等因欽此仰見 朝廷勤求民隱鄭重海防之至意竊維泰西創行鐵路將及百年實爲馴致富強之一大端其初各國開建幹路以通孔道迨後物力日裕闢路日多支派員注都邑相屬百貨由是而溜輪軍屯由是而聯絡上下公私交受其益初費鉅資後享大利其功效次第實在於此今中國方汲汲請求安攘之略自不得不採彼長技以爲自強之助伏查總理海軍事務衙門覆奏所陳迭海防省重兵便轉運通貨物興礦產利行旅速郵傳捷賑濟諸條鐵路之利亦已詳明確實包舉無遺且欲推之南北各省廣安鐵路以振全局在王大臣謀畫閭達本非專爲津通之一隅臣之愚見竊以爲今日鐵路之用尤以開通土貨爲急蓋論中外通商之時局中國民生之靈歎商務之思耗專視乎土貨出產之多少與夫土貨出口較洋貨進口之多少以爲斷近數年來洋藥洋貨進口價值每歲多於土

貨出口價值者約二千萬兩若再聽其耗漏以後斷不可支現在洋藥洋貨之來源無可杜遏惟有設法多出土貨多銷土貨以救之此乃王道養民立國之本源並非西商爭利會計之小數中國物產之盛甲於五洲然腹地輿區工艱運費其生不蕃其流不植且土貨率皆賤粗價廉非多無利非速不多非用機器化學不能變粗賤爲精良化無用爲有用苟有鐵路則機器可入笨貨可出本輕費省土貨旺銷則可大減出口稅釐以鼓舞之於是山鄉邊郡之產悉可致諸江岸海壩而流行於九州四瀛之外銷路暢則利商製造繁則利工山農澤農之種植牧豎女紅之所成皆可行遠得價則利農內開未盡之地寶外收已虧之利柙是鐵路之利首在利民民之利既見而國之利因之利國之大端則徵兵轉餉是矣方今強鄰環伺外患方殷內而沿海沿江外而遼東三省察隴沿邊回環何止萬里防不勝防費不勝費若無輪車鐵路應援赴敵以靜待動安所得無數良將精兵利礮巨餉而守之夫守國卽所以衛民故利國之與利民實相表裏似宜先擇四達之衝首建幹路以爲經營全局之計以立循序漸進之基至津通一路其緩急輕重之宜尙有宜加審察者請爲我皇上縷晰陳之查御史余聯沅等原奏或恐洋教之煽張或惜捐金以資敵或以狡謀利啖爲懼或以人心風俗爲憂不知鐵路不過行程迅速至洋人洋教之多少與此無涉造路之鐵可用華產修路之工仍用民人洋匠薪水亦屬有限洋廠勦造不過市僧圖獲貿易

之故智此事似非別藏禍心輪車與輪船電綫等確有利用之實不得謂之淫巧凡此數端舉無足慮至所呈引敵失業兩事業經王大臣剖析詳盡自屬切中時宜惟津通密瀾釐穀非尋常散地可比以臣所聞俄德鐵路相接俄人則改寬其鐵道以阻止德車德國鐵路之入都城者必穿行士郵遠轍而後得達柏林法國巴黎城外諸路皆有大堡環護之即英人與法接界處海底鐵路之議雖因工艱而止亦由忱於法岸近峙自失海險之故是外國顧念根本未嘗不格外慎重深慮今大沽鐵路已至天津若再開至通州不爲置兵築壘以扼要隘但恃臨時收車撤軌之圖則備豫似覺未密苟於中途多設堅臺巨礮以爲之備則所費必在百萬以外籌款實屬不資其當審者一也查奎潤等摺內稱津通之民以車船行店負販爲生者約六萬人一家五口已有三十萬人此項人數本雖確知然就極少計之仰食於此者總不下六七萬人粗貨舟行不能盡廢短車客店不能盡歇尙可安插其半其廢業者必有三萬餘人若鐵路既開其投効公司傭趁車站同必需轉移執事之人顧津通二百餘里地段不長中站停頓不過數處一切修路掃軌等役需人不能甚多據西人鐵路述略稱英地四萬里鐵路執事等衆需十六萬五千人以此爲準津通二百餘里蓋需八百餘人加以各項販運夫役不能過三千人其鐵路左右鄰近鄉邑無甚巨鎮名區人貨趕集亦難甚旺多方安插終恐不敷且津通一路內近神京外近海口又有倉場三者

兼之開民苦其太多而地段苦其太短其難於消納實與他處不同至於蘆舍尚可給費遷移若墳墓多
 所毀遷亦恐不易設處其當審者二也或謂非常之舉難與圖始鐵路為利便所在不宜輕聽過計致失
 事機顧查所以續辦津通者但為養路計耳夫欲籌養路之需而度支轉益屯防之費恤公司之困而郊
 甸乃有無告之民利害相兼宜籌兩全之策其當審者三也又查西國鐵路每為距遠水口陸行艱滯而
 設有無輪車利鈍懸絕故雖重費勞擾而不嫌今則滌河深通帆船如織車驟馳驟經宿可至商旅驟遞
 為益無多權以西例此路尚非所亟其當審者四也至於徵兵一節誠於軍事有益然當今所憂者外患
 耳津沽為京師門戶常屯重鎮在大沽有事後路援師早應厚集津門若待至天津郡城告急勢難再分
 都門之禁旅遠出赴援亦無從抽大沽山海關之防軍回師宿衛苟無此路亦無甚妨其當審者五也夫
 利不顯而不興害雖隱而必慎既非萬不得已之計即宜防意外枝節之端設此路創造之時稍有紛擾
 則習常蹈故者益將執為口實視為畏途以後他處續造集股之官商必裹足疑沮之愚氓必有辭則鐵
 路之功終無由成而鐵路之效終無由見矣記曰先其易者後其節目及其久也相說以解言興事宜有
 次第也今津通一路關係既重不便尤多此亦鐵路中之節目也竊查翁同龢等請試行鐵路於遠地以
 便運兵徐會澄等請改設於德州濟甯就黃河故道墊路以便運漕均擬緩辦津通為另闢一路之計但

邊地偏遠無碑全局若於僻隅發端其效難見且非商旅輻輳之所則鐵路費無所出不足以自存德濟一路黃河岸闊沙鬆勉強堆築工費太鉅河流遷徙無定其鐵橋等事尤難時時改作似擬改之路尙非盡善盡熟以爲宜自京城外之蘆溝橋起經行河南達於湖北之漢口鎮此則幹路之樞紐枝路之始基而中國大利之所萃也蓋豫鄂居天下之腹中原綽綽肯出其塗鐵路取道宜自保定正定磁州歷彰衛懷等府北岸在清化鎮以南一帶南岸在滎澤口以上擇黃河上游灘窄岸堅逕流不改之處作橋以渡河則三晉之轍下於井陘關隴之驛交於洛口西北營息刻期可通自河以南則由鄭許信陽驛路以抵漢口東引淮吳南通湘蜀萬里奔湊如川赴壑語其利便約有數事內處腹地不近海口無引敵之慮利一南北二千餘里原野廣漠編戶散處不如近郊之稠密一屋一墻易於勘避利二幹路袤遠廠站多經路生利既繁緯路枝流必旺執鞭之徒列肆之賈生計甚寬舍舊謀新決無失所利三以一路控八九省之衝人貨輻輳貿易必旺將來汴洛荆襄濟東淮泗經緯縱橫各省旁通四達不悖豈惟充養路之資費實可裕無窮之餉源利五近畿有事三楚蜀部兩淮精兵電檄一傳不崇朝而雲集都下或內地偶有土寇竊發發兵征討旬日立可蕩平徵兵之通莫此爲便利六中國礦利惟煤鐵最有把握太行以北煤鐵最旺而最精然礦最重路最難既有鐵路則釐機器以開採用西法以煎鑄礦產日多大開三晉之利

源永塞中華之漏卮利七海上用兵首慮糧漕南漕米百餘萬石由鎮江輪船溯江而上三日而抵漢口
又二日而達阜城由蘆溝橋運赴京倉道里與通州相等足以備河海之不虞關飛挽之坦道而又省挑
河剝運之浮糜較之東道王家營一路礙於黃河下流者辦理最有把握利八此路既成但有利便並無
紛擾民受其益人習其事商視其利將來集資推廣續造不至爲難兵民食貨無往而不宜公私行役轉
運盜竊損失兩源稍延虧耗蝕之患不禁而自止關東隴右以次推行惟力是視二十年以後中國武
備屹然改觀矣難者曰幹路之利誠如此矣其如費鉅難成何則請以分段之法爲之擬分自京至正定
爲首段次至黃河北岸又次至信陽州爲二三段次至漢口爲末段中原地勢平衍工力可省若令承辦
員匠核實摺節估計大約每里不過五六千金一段不過四百萬內外合計四段之工須八年造成則款
亦八年分籌中國之大每年籌二百萬之款似尙不至無策開辦之始先從首段估造俟末段工竣餘段
以次推廣其籌款之法除由鐵路公司照常招股外應酌擇各省口岸較盛鹽課較旺之地分別由藩運
兩司關道轉發印票股單設法勸集集股多者股商及承辦之員優予獎勵並准該公司援照前案暫借
商款墊解以資周轉至購買鐵料取之海外則漏卮太多實爲非計查山西之鐵產自平定盂縣者可運
至於隰縣縣產自澤潞者可運至於清化鎮鐵軌非同船載取材不在至精土鍊之產雖邇洋鐵亦足濟

用卽使價值賤幾微其財仍散在中國不宜斤斤計較應一面迅速於正定清化分置鍊鐵機爐以供
取用除首段動工參購洋料外其餘悉用土鐵以杜外耗庶幾施工有序而藏富在民繼之津通之視豫
鄂度地考工相去懸絕上之爲是議者非敢有驚廣侈大之心實以置路於不可開之區雖一節有所必
惜展路於有利無害之城卽艱重亦所當爲擬請責成李鴻章仍令原派總辦鐵路各員督飭該公司熟
籌全局擴充原議次第舉工上誠解迂愚謹遵接切時勢各抒所見之 旨竭誠籌度詳切上陳伏候

聖明裁度飭下海軍衙門通籌熟計採擇施行國計幸甚民生幸甚至該公司請試辦鐵路原案係自認
接續至山海關此路通接關東誠爲要工應飭其照案修造未便聽其中道改圖重斷罔利如必以養路
賠累爲辭則此乃海防應辦之事無妨籌動官款或酌助官本或於目前該公司生理未旺之時暫行酌
給津貼養路經費以示體恤其商借洋債仍由該商自行清理似覺較爲簡易欽奉 慈禧端佑康頤昭
豫莊誠壽恭欽獻皇太后懿旨前因籌辦鐵路事宜諭令沿江沿海將軍督撫各抒所見以備採擇嗣據
陸續覆奏詳加披閱其偏執成見不達時勢另籌辦法尙未合宜者毋庸議外張之洞劉銘傳黃彭年所
奏各有見地而張之洞所議自蘆溝橋起經行河南達於湖北之漢口鎮畫爲四段分作八年造辦等語
尤爲詳盡此事爲自強要策必應通籌天下全局海軍衙門原奏意在開拓風氣次第推行本不限定津

通一路但冀有益於國無損於民定一至當不易之策即可毅然興辦勿庸築室道謀著總理海軍事務衙門卽就張之洞所奏各節詳細覆奏明請旨張之洞劉銘傳黃彭年摺各一件均著鈔給閱看○乙酉張煦奏請將陝省尋常盜案改題爲奏以期迅速得旨如所請行○丙戌予景壽續假一月○劉錦棠奏提督趙舉樂等病故請卹允之○李鴻章奏煙臺電局學生從九周傳謙敗壞局規劣跡昭著請卽革職得旨如所請行○丁亥長順等奏籌辦災賑得旨卽著飭屬認真籌辦妥爲撫卹該部知道○戊子以寶如田爲浙江處州鎮總兵○調卓凌阿爲吉林副都統恩澤爲瑯春副都統○前任呼倫貝爾副都統薩克慎卒卹廕如例並賞銀五百兩治喪○以馮爾昌爲大理寺卿○定安等奏籌辦春賑得旨覽奏已悉卽著飭屬妥籌賑撫務期實惠均沾毋令一夫失所餘依議該部知道○定安等奏酌定東糧販運出境以五六萬石爲限下戶部知之○岐元等奏請獎勵辦馬邊夷匪出力員弁下戶部議奏○升秦奏藏兵已撤赫政到邊及擬赴白棟與英官會議分界通商事宜下該衙門知之○己丑諭志元奏總管押離職守據實參奏一摺行宮重地理宜敬謹看守據奏總管清桂並不常川在公所居住去歲半壁廣行宮有風雨坍塌情形亦並未驗報實屬怠玩清桂著交部議處○庚寅吳大澂奏鄭工合龍以後應辦善後事宜及造冊報銷測繪河圖諸務並籌善後局辦理報聞○崧駿奏二月分海州沙水情形下

工部知之○諭部宜奏查勘 永陵四碑樓等處應修工程請與啟運殿等工一體興修一摺 永陵啟運殿等工前已有旨令欽天監擇吉知照興修此次 永陵四碑樓等應修各工仍著盛京將軍會同工部侍郎遵照選擇吉期一體敬謹興修餘依議該衙門知道○辛卯 上諭 大高殿祈雨○宴朝鮮貢賀正副使臣隨員等於禮部衙門○諭黃彭年奏營勇抬鹽被燒斃命請將知縣及統帶等官分別懲處各摺片此次江蘇鹽捕營哨弁王永昌恃與哨官吳家正姻親膽敢率屬勇至泰賢紅廟地方搶劫鹽民張照銓家門外鹽斤致鄉民激怒燒斃多命該弁勇等行同烏匪固屬咎由自取而該鄉民等既能捕獲並不送官究治輒行致斃十四命之多實屬凶殘藐法此風斷不可長著該署撫嚴飭地方文武將滋事要犯勒令緝拿訊明懲辦泰賢縣知縣陳熊才疎於防範該營官等約束不嚴均難辭咎陳熊才著先行摘去頂戴統帶緝私營候補道丁兆基著摘去翎頂統領哨官候補遊擊吳家正著卽行革職以示懲儆至所稱明定緝私章程各節著會商崧駿妥籌辦理○壬辰諭剛毅奏兵丁借支常平倉穀開單呈覽一摺山西省前四年間被旱成災兵民生計維艱准予借給倉穀除歷經扣還外尙有未還穀石無力歸還加恩著照所請所有各兵丁未完前借倉穀一萬七千十石零著一律豁免以示體恤○諭前因山東連年災歉迭次籌撥銀兩復以該省災區甚廣截撥南漕賑濟朝廷軫念窮黎無時或釋朕恭奉 慈禧端

佑康頤昭豫莊誠壽恭欽獻皇太后懿旨東省災民甚衆恐前撥銀兩尙有不敷著發去宮中節省內帑銀十萬兩作爲賑款交張曜分委委員詳查災區迅籌散放欽此該撫務當仰體 慈懷妥速遵辦總期實惠及民毋任稍有弊混以副加惠災黎至意○癸巳諭湖南按察使薛福成著開缺以三品京堂候補並賞給二品頂戴○以鳳鳴爲內閣學士○賞男爵壽昌二等侍衛在大門上行走○鍾澤因病請解任允之○唐炯奏雲南銅礦急需開鑿通風洩水三種機器已委員前赴東洋採辦所有經過關卡擬請飭下一體免納稅銀得 旨著兩江總督曾國荃轉飭遵行○甲午調志麟爲京口副都統以祥普爲鑲黃旗蒙古副都統○諭奕謨等奏匪徒假捏公文私雕印信牽涉職官請分別交部訊辦一摺據稱本年三月間鑲紅旗漢軍挑送庫兵認差旋據戶部三庫衙門文稱並未咨取查明印文係屬偽造經該都統等訊問印務筆帖式領催等所供情節支離牽涉參領佐領等官營私舞弊等語覽奏殊堪詫異亟應澈底根究領催賁珍承愷聞散英沛著交刑部嚴刑審訊參領萬桂協領佟澤沛均著先行解任唐筆帖式廣福一併聽候傳訊該都統等未能先事查出亦難辭咎都統奕謨著交宗人府照例議處副都統色普徵額崇光均著交部照例議處餘著照所擬辦理○乙未沈秉成奏復設護商扒船下部知之○以竊印人犯緝獲開釋正白旗滿洲都統管下值班官弁○命徐桐錫珍熙敬曾紀澤爲寶錄玉牒抖諒大臣○

以沈晉爲湖南按察使○免雲南蒙自縣屬被災田糧○祥亨奏湖北荊州駐防八旗官兵所有差操一切及養贍身家皆恃歲支俸餉軍興以來俸餉減成支放以致入不敷出困苦難堪現值整頓防務之時若不亟籌補救殊不足以體卹兵艱查京師八旗兵丁歲支俸餉數恩按照額全支荊州駐防同係國家世僕擬仍照章全數支放俾官兵稍紓困苦既無衣食之虞自於差防益加勸奮下戶部議奏○祥亨奏防軍洋鎗隊伍請加津貼銀兩下戶部議奏○丁酉李鴻章奏東海關應支一切經費向在經徵洋稅招商局稅內按每兩扣提八分濟用嗣經戶部咨應改照津海關辦法祇在洋稅內扣提八分毋庸再在招商局稅內扣提其自一百大結起已在招商局稅內扣提銀兩應令撥還等因飭據該關道盛宣懷遵將一百大結起招商局稅內已提銀兩照數撥還歸款惟僅於洋稅內扣提八分實不敷用請就土藥釐金項下通融撥補未經戶部核准茲又據盛宣懷稟稱該關應支一切經費係員友書差薪脩飯食心紅紙張及巡船緝私等項本經早年奏定當時已竭力節減無可再少歷經循辦無異並已造報准銷今不准於招商局稅內扣提八分核計每年短至數千兩且上年山東議定保護沿海遭風商船新章應於該關勵支經費是應支之款加增而扣提之數反減恐何取給自光緒十二年十二月一百大結起至一百八結止九箇月共扣洋稅八分銀一萬五千六十餘兩共支各項經費銀一萬七千八百五十餘兩

實短銀二千七百九十餘兩又自一百九結起至一百十二結止一年共扣洋稅八分銀一萬七千四百九十餘兩共支各項經費銀二萬一千六百八十餘兩實短銀五千一百餘兩均經分晰冊報有案計每年以收抵支約不敷銀四五千兩各款皆係緊要按月待領不能緩欠該關又無他項可以彌補實恐誤公○查津海關扣提洋稅八分經費不敷向准在洋藥釐金項下撥用該關事同一律現在洋藥釐金已有指定用款應請在所收土藥釐金內撥用即自一百六結為始仍視經徵洋稅之衰旺以為撥用土藥釐金之確數如果此後洋稅旺收應提八分足敷開支不特土藥釐金無須撥用即洋稅八分有餘亦必專款存儲斷不敢稍有糜費等情具稟請奏前來臣覆核所詳屬實亦與津海關成案相符應請准其照辦以昭平允下戶部知之○李鴻章奏長蘆行銷直岸引鹽前因運本過重商累太深奏准自同治十三年六月起每斤加實價制錢二文稍資津貼五年為限嗣經前國子監司業汪鳴鑾請推展蘆商賣鹽加價以助直賑飭據運司報自光緒五年六月起展限五年責令商人每年交銀二萬兩彌補直賑不敷之款追限滿賑款未能交足又於光緒十年起展限五年在案扣至本年五月限滿據運司額勒精額詳稱直岸商人楊俊元等以引岸銷滯行路艱難成本增重兼因鄭工皖賑銀十萬數千兩從前賑款尚未交完後來新捐為數益鉅以致商困更甚請再將加價展限五年查此項加價前請展限五年責令每年交

銀二萬兩以歸庫墊兼濟賑需本擬限滿商力稍紓卽請停止乃近年各岸仍形銷滯運艱本重又值鄉工需款浩繁蘆商認捐銀十萬兩並捐皖賑等銀五千兩洵能竭力急公當此疲困之時若不量加體恤勢必顧此失彼有誤課運且直隸災歉頻仍連界之山東奉天亦遭水患既須自賑又宜恤鄰不得不籌備款項請自光緒十五年六月起直岸鹽加價再予展限五年仍責令每年隨引交銀二萬兩以恤商情而裨賑款等情具詳請奏前來臣查前准部議蘆商積疲賴有加價稍資周轉且直隸辦賑亦於此取給係於恤商之中兼助賑款起見不致病民等因今運司請展五年仍係恤商助賑之意與部議相符應請照辦得 旨如所請行○己亥命管賑爲後屆大臣○諭禮部奏請改派護宴之護軍統領並自行檢舉一摺二十六日緝譯貢士覆試前已派德隆稽查中左門同日恩榮宴護宴差使復經派出該部奏請簡派單內未將德隆銜名扣除殊屬疎忽承辦司員著查取職名交部察議所有恩榮宴護宴之護軍統領著改派謙光○庚子諭本年正月間朕大婚禮成行慶推恩所有近支王公勳舊後裔除業經分別獎給外員勒載滿著賞加郡王銜二等鎮國將軍載瀚著封爲不入八分輔國公委散秩大臣載瀛載津均著封爲二等鎮國將軍載瀚之子溥倬著賞給二品頂戴用示嘉惠茲親至意○賜張建勳等三百三人進士及第出身有差○辛丑 上詣 大高殿 宣仁廟祈雨○壬寅加賞王恕圖煮賑米石○乙巳楊

昌濬奏各標營副參遊等請由外題補下兵部議奏○日本國使臣鹽田三郎卒參贊金立吐辭署理

五月丙午朔諭張家口監督英啟奏差滿回京應交盈餘銀兩並請減成賠繳虧短盈餘銀兩一摺所得盈餘銀三千二百七十三兩零著交廣儲司其所請減成賠繳之處著戶部核議具奏尋戶部奏英啟所收較上屆爲多所有盈餘應多免六毫得 旨如所議行○戊申諭前因京師入夏以來雨澤稀少朕疊

次親詣 大高殿並詣 宣仁廟拈香分派員勒載澤等恭詣 時應宮等處拈香近日雖經得有微雨

仍未渥沛醴膏現在節近芒種農田待澤孔殷實深焦盼允宜再申虔禱以迓甘霖著遴選光明殿道衆在 大高殿虔禱遴選僧衆在覺生寺諷經均於本月初六日開壇是日朕親詣 大高殿並 時應宮

拈香派巴克坦布在彼常川住宿並派寧親王魁斌貝勒奕綱海年克文分爲兩班輪班住宿上香行禮覺生寺派豫親王本格拈香派海緒常川住宿並派莊親王載勛鎮國公載遷立端錫光分兩班輪班住宿上香行禮 昭顯廟著派員勒載澤 宣仁廟著派員勒載澍 凝和廟著派員子奕麟拈香並派鄭

親王凱泰恭詣 黑龍潭拈香所有派出之王大臣等俱著先期齋宿分往行禮○己酉薛福辰因病解

任○庚戌賜王公大臣御前侍衛等綢扇○升泰奏奴才於光緒十五年三月初一日曾將辦政到邊日期並邊界情形由五百里馳奏茲於三月初旬前委赴藏之噶布倫伊喜批冲等已由藏折回到邊境喇

噶與奴才致函極道知感又第穆呼圖克圖率領三大寺及閩藏番官呈遞印票敘稱西藏佛土自成聖
年間卽閩藏公議實因彼此教道不同早經共立誓詞不與洋人交接刻因 大皇帝簡派大臣赴邊查
辦飭令委員迭諭飭辦撤兵定界通商三事我藏番等不敢違 旨業經遵諭撤兵至於定界上年本有
辦界嗣因將日納宗賞與哲孟雄其隆吐山之格壓傾倉地方實有我藏番百姓遊牧草場的係藏哲孟
界至於咱里山本無鄂博不過上年屢次在此阻擋洋人是實若通商一事我藏番實屬萬難但刻蒙駐
藏大臣及各委員奔走冰天雪海又與洋人據理辯論所說一切言詞秉公正直我閩藏僧俗實所共聞
我等既受重恩何敢固執違命茲我閩藏人等因伊喜批冲回藏之行大衆再四會商不敢有負 大皇
帝天恩萬不得已遵諭通商惟咱利以內洋人斷不可來總求施恩能在咱利以外實沾恩典奴才察看
來稟所陳言詞尙非乖謬且通商一事從前歷任大臣百計開導該番一味固執矢口不移茲幸迭蒙
聖訓該藏番已知感悟漸就範圍將來卽可藉通商爲善後計此皆仰賴 皇上指授機宜 廟謨碩畫
得使冥頑不靈之輩一旦翻然知悔全藏叨幸實深惟卽使接奴才照會藏兵已撤之文業經一月至今
印兵未見退回刻聞咱利山頂之雪漸稍稍可行走奴才卽促赫政速赴印營約期定議並將一切情形
詳細告知云藏番已遵 旨罷兵又允定界通商駐藏大臣於藏番已無可再辦之事若印兵再不撤回

以爲藏番無能可以任意要求致另出事端則其理屈不在藏番曾與赫政切囑再三並將應讓之事除
赫政所開十條逐款明白告知又由奴才酌議數條一併開摺分晰詳告該稅務司面云業已領會赫政
卽於三月二十一日由仁進岡啟行前赴印營一俟接到赫政來信約期卽星馳前往定議弗敢稍涉稽
延下該衙門知之○辛亥 上詣 大高殿 時應宮祈雨○癸丑停止本年朝審秋審情實人犯處決
○予慶裕病假兩月○諭御史余聯沅奏宗人府起居注主事升途沈滯請飭部設法疏通等語著吏部
議奏○賞捐助蘇皖賑之在籍編修王文在五品銜○諭戶部奏虧短銅斤委員請旨交部嚴追一摺雲
南運銅委員惠山運解京銅短交三萬八千餘斤應賠銀五千餘兩前經部議革職勒追今期限久逾仍
未完繳實屬任意延玩已革雲南楚雄縣知縣惠山著鑲黃旗漢軍都統送交刑部嚴限監追以儆玩泄
○升泰奏奴才於三月二十四日恭奉二月十一日 諭旨以邊事責成奴才一手經理萬不可稍存退
縮推諉之意並蒙 訓示一切跪聆之下益切悚惶竊查前於三月二十一日陳奏辦理情形藏番已允
定步進商惟通商一層三寺僧衆必求在日納宗地方奴才竊料英官萬不允從當卽飭令委員再行切
實開導諭以通商之地與界址不同並非咱利以內洋人所到之地卽爲他人所有爾等儘可無虞且通
商必須設關所定亞東地方兩山相對中有平曠正可在此修建關卡若咱利以外係屬絕嶺荒山瘴霧

終年雖六月盛夏猶有積雪經商務者何能在彼駐扎來往各商亦勢必裹足該藏番等又復聚議多日委員等百計開導夜以繼日費盡無限唇舌始據在邊僧俗噶布倫等遞具遵結前來而赫政山獨有續來兩謂前次摺開各款印督尚未逐件回覆會議尙須稍候印使故意拖延殊不解其居心奴才竊思藏番既允在藏界之內通商則已與前准遊歷及改爲飭令西藏通商之旨相符英人雖強似乎再無可以要挾妄求至哲孟雄狡猾居心不敢必其無受洋人指使之事照舊二字奴才雖與英人力事然亦必相機而行昨已婉諭藏番如英官能即照辦回屬甚善倘英人藉此不允因之藏案遲難完結亦惟有斬斷葛藤議立妥約免致後來因他事又生枝節該藏番似無固執奴才亦未敢求效太速自當恪遵前旨徐與磋磨總期藏案可結以冀上紓宸座至通商事宜應俟定議之後再當奏陳下該衙門知之○甲寅以高萬圃爲湖南布政使陳慈爲順天府府尹○丙辰命迎卹邯鄲縣聖井鐵牌來京供奉○丁巳定安等奏遣撤吉林客隊仍以原餉募練本省兵勇得旨准行○諭沈秉成奏土屬匪徒滋事將首要各逆悉數捕除等語廣西慶遠府土屬匪徒莫輜經欲圖土職謀害土官主令黃道英糾衆滋事乘機盤踞煽掠誘脅至七八百人經沈秉成派委知府吳昭然等會同地方文武督帶勇練設法兜拿將首逆莫輜經黃道英先後拿獲審明正法並緝獲匪黨楊玉成等多名辦理尙爲迅速在事出力各員准其酌量

保獎并許冒濫仍著沈秉成飭屬解散得從隨時實力防範以靖地方○諭前據御史文郁奏張家口管理牧羣主事文鑑勒索規費意存庇護等情當諭李鴻章查奏茲據逐款查明據實覆奏此案文鑑藉口查革任意刁難向各牧羣勒索銀兩既經查出確據者已有五百餘兩之多實屬貪劣昭著荒謬異常文鑑著卽革職永不敘用以示懲儆察哈爾都統托倫布雖查無受賄情事惟於司員勒索失於覺察著交部議處該處牧羣積弊已久管理人員營私害公惡習相沿實堪痛恨著該都統卽將一概陋規嚴行查革嚴飭屬員等實力整頓體恤兵丁以期牧政日有起色倘仍前玩泄定當嚴懲不貸○戊午張之洞奏欽州增改教職各缺下吏部議奏○己未諭前因京師入夏以來雨澤稀少業經設壇祈禱朕迭次親詣大高殿並宣仁廟等處拈香派員勒載澧等分詣時應宮等處拈香旬日以來濃雲密布風色漸和雖經得雨尚未深透現在節逾芒種亟盼渥沛甘霖允宜再申虔禱朕於本月十八日親詣大高殿並宣仁廟拈香仍派親王本格詣覺生寺拈香時應宮著仍派員勒載澧昭顯廟著仍派員勒載澧凝和廟仍派員子奕謨並著仍派親王凱泰詣黑龍潭拈香大高殿覺生寺常川住宿並輪班住宿上香行禮仍著原派之王大臣等敬謹將事○庚申予祁世長修墓假四月○壬戌上詣大高殿宣仁廟祈雨○甲子諭給事中劉恩溥奏各省營員緝獲著名巨匪請照軍營章程保加升銜等語著

該部議奏○乙丑兩○予潘爵病假兩月○予故雲貴總督劉長佑廣西省城專祠列入祀典○諭定安等奏查勘 福陵 昭陵應修工程請擇吉興修一摺著欽天監於本年六月內選擇吉期先行知照卽著盛京將軍會同工部侍郎屆期敬謹興修○丙寅兩○丁卯夏至節大祀 地於 方澤○兩○李鴻章奏查得淮軍盛字營及親兵前營天津鎮雲字營戰馬多有疲弱倒斃者茲派都司魏金堯千總安廷玉夏崇順前赴張家口喇嘛廟一帶採買膽壯戰馬五百五十四以補缺乏所經關卡請 旨飭下一體免稅放行下兵部知之○己巳予故西安將軍多隆阿福州將軍穆圖善安徽省城專祠列入祀典○卹故游歷英法工部主事孔昭乾○諭潘祖蔭高萬鵬奏遵保轉運鄒工要需出力各員開單請獎一摺著吏部議奏○諭直隸邯鄲縣 龍神廟祈雨顯應疊經加上封號近因京師雨澤稀少迎請鐵牌甫於本月二十日供奉大光明殿旋於二十一二十二二十三等日疊沛甘霖靈現立昭寶深寅感著再加封靈應昭佑宏濟溥惠聖并龍神朕親書匾額一方交李鴻章祇領敬謹懸掛以答神庥○諭前因京師入夏以來雨澤稀少朕迭次親詣 大高殿並 宣仁廟等處拈香派員勸載瀉等分詣 時應宮等處拈香並經開壇祈禱仰荷 昊慈眷佑連日疊沛甘霖郊原普徧寅感實深允宜敬謹報謝用答天庥朕於本月二十七日親詣 大高殿並 時應宮拈香著派員勸載瀉恭詣 昭顯廟員勸載瀉恭詣 宣仁廟

貝子奕謨恭詣 凝和廟拈香豫親王本格恭詣 覺生寺拈香親王凱泰恭詣 黑龍潭拈香仍著
先期齋宿於是日分詣行禮報謝 大高殿覺生寺卽行撤壇仍冀順邀鴻貺甘澍優渥以慰農望○庚
午諭兵部奏遵議處分一摺察哈爾都統托倫布應得降一級調用處分著加恩改爲降三級留任○辛
未 上詣 大高殿 宣仁廟報謝○派高萬鵬恭送鐵牌回邯鄲縣聖井供奉並賜御書匾額加封靈
應昭佑宏濟永澤聖井龍神曰溥惠○癸酉調丹江衛屯田被水秋糧○諭御史周天霖奏京師盜案疊
出請飭整頓捕務一摺肇殺重地盜案疊出總由捕務廢弛亟宜實力整頓著步軍統領衙門併入劉恩
河前摺將緝捕章程及如何申明賞罰以示懲儆之處悉心妥議具奏所有本月初二日廣安門外松壽
富鋪被盜一案並著該衙門查明覆奏○諭御史周天霖奏內外官員補班兩歧請飭部核議章程等語
著吏部議奏○是月日本國新簡駐華使臣大島圭介抵任

光緒九十五

臣朱壽朋敬編

臣汪錫增恭校

六月丙子諭雲貴總督岑毓英秉性公忠才識沈毅山諸事咸能成行咸能成事年閏雲南回匪倡亂兵事孔殷叩荷 先朝特達之知迭加超擢代理雲南藩司旋即簡授巡撫當兵單餉絀之時激厲衆心出奇制勝克復省城肅清大理等府掃穴擒渠全滇底定厥功甚偉迭經賞給騎都尉並改爲一等輕車都尉世職朕御極後擢任雲貴總督整頓地方操練營伍均能實心任事光緒九年統兵出關卓著勞勩復加賞一等雲騎尉世職該督久居邊陲染瘴成疾上年查閱營伍途次觸發舊病迭次請假調理本年四月力疾銷假方冀醫治就痊長資倚畀片連聞謫逝軫惜殊深岑毓英著加恩管贈太子太傅入祀昭忠祠並於雲南建立專祠生平政蹟事實付國史館立傳賞銀一千兩治喪由雲南藩庫給發照總督例賜恤任內一切處分悉予開復應得卹典該衙門察例具奏靈柩回籍時沿途地方官妥爲照料伊子遇缺卽補道岑春榮著俟有道員缺出請旨簡放候選同知岑春煦著以知府應升之缺升用前工部郎中岑春炳著以五品京堂候補監生岑春聲著俟服闋後由吏部帶領引見岑春蘭並伊孫岑德純均著俟及

歲時帶領引見用示篤念疆臣至意○楊昌濬劉錦棠光緒十五年正月三十日奉上諭色楞額等奏伊犁邊界巡撫礙難遙制擬將地方文武仍歸將軍副都統就近專轄一摺等因○等竊維自古有治人無治法而擇人以使權在一朝廷非臣下所敢私議○錦棠是以於本年二月初二日具奏請旨定奪此奉批有仍令會同議覆仰見聖慮周詳慎重邊防之至意○等何敢引據舊章終默不言伏查色楞額等所奏各節自係爲邊防緊要起見伊犁塔爾巴哈臺本皆新疆境地昔年屯兵制守則南北各有不同今既建省設官則伊犁塔爾巴哈臺無容獨異蓋同此邊疆必須聯爲一氣而巡撫統轄全境尤應併計兼轄若以伊犁一隅之地畫疆而理不特事涉紛歧且恐形勢扞格貽誤必多前此部議伊犁將軍改爲駐防旋經奏准裁參贊設副都統以改照駐防之制是體制業經奏定誠如聖諭一切官制營制甫經議定未便遽行更張也況前奏聲明將軍節制鎮道較之內地駐防其分吏崇其權亦重何必再行改易至原奏內稱伊犁距省太遠巡撫礙難遙制查南路之阿克蘇道距省二千餘里遠於伊犁約將一倍喀什噶爾道距省四千餘里遠於伊犁約且數倍伊犁距省不過一千四百餘里已難遙制然則南路兩道所屬又將如何且塔爾巴哈臺之距伊犁與伊犁之距省城正相等耳將軍能制塔爾巴哈臺之地豈巡撫獨不能制伊犁之地原奏又稱塔爾巴哈臺邊有要務及地方重大

事件卽由副都統隨時辦理一面咨明將軍酌核其倉庫之盈絀驛傳之遲速文武官吏之賢不肖均由副都統就近考核進退若命盜案件仍歸伊塔道核轉等語於體制亦多不合惟原奏請於漢隊分撥一千五百人倣成都將軍之例設立軍標一節臣等查將軍副都統設立軍標營制藉壯聲威自應照辦擬請於伊犁原定漢隊四千人之內分撥一千人隸之將軍餘悉隸之鎮標塔爾巴哈臺原定漢隊二千人之內分撥五百人隸之副都統餘悉隸之協標於兵數餉數並無增加除旗營及蒙哈藩部喇嘛等事並交涉事宜必須隨時決制者統歸將軍辦理其伊犁塔爾巴哈臺等處地方文武均請歸新疆巡撫管轄仍照前奏由伊犁將軍節制鎮道如蒙 俞允其一切應辦事宜容 臣等詳晰會商另行奏明辦理得旨如所請行○諭步軍統領衙門奏拿獲盜犯先行覆奏一摺五月初二日廣安門外松壽當舖被盜搶劫右營遊擊鵬展等登時往捕該匪膽敢放鎗抗拒當經該遊擊等追獲盜匪一名並現贓多件緝捕尙屬出力所有已獲之盜犯張三交刑部嚴行審訊按律懲辦仍嚴飭該員弁等將在逃之張皮慶等迅卽嚴拿務獲審辦毋任漏網遊擊鵬展守備石俊興著俟逸犯就獲後准其從優保獎○丁丑以王文韶爲雲貴總督○調蒯德鎬爲福建臺灣布政使以鄧華熙爲湖北布政使岑毓英爲雲南按察使○以邵友濂爲湖南巡撫○戊寅以徐致祥爲都察院左副都御史○壬午予怡親王載敬續假三月○癸未 上

詣 奏先殿 壽皇殿行禮○甲申命額勒和布李鴻藻為承修太和門工程大臣○劉銘傳奏臣前准
部覆臺灣要缺知縣一項暫准不論資格一體酌量請補俟三年期滿仍照定例辦理新設知縣各缺先
准酌量補署一次其變通章程行令察看定限奏明等因查臺灣際此行省初設事事創始因地擇人藉
收指臂之助實為目前第一要義誠恐格於定例棄置人材此上所以前有變通之請前設知縣要缺既
准部議變通補署三年屆時能否仍循定例應否再展自當再行察酌惟新設各缺茲擬加察看不特當
此草創經營猝難就理況多地居新闢番界煙瘴尤重人地既貴相宜變通期限似不能不酌量從寬應
請仍照前議以十年為限俾資治理再現在臺地各項差事在在需人一俟變通限滿而此項在臺差委
用人員永無補期似不足以昭平允所有中簡屬縣及佐雜各缺可否仿照一咨一留章程在內地調補
一次就臺差委各項班次人員請補一次以示鼓勵下吏部議奏○張煦奏查陝省營田係同治初年逆
回叛產照例入官同治四年設局清查招墾共計荒地四千一百二十七畝原定章程平原旱地額
租上則每畝三石中則二石下則一石五斗俟額租交足發給執照地歸佃戶管業計有營田二十五州
縣長安一縣內有水田准按上則完納向來大荔縣另有沙地議定上則每畝完租銀五錢中則四錢下
則三錢租清並准撥地給照旱地應交租課無論小麥粟穀三項悉聽民便交納自同治四年設局起至

光緒六年夏季止共墾荒地三千四百頃零四十餘畝佃戶應交租糧均未足額前撫臣馮馨駁查明佃戶交租有運裁耗餘等說未墾荒地多屬硤确之區貧民不願領種酌改舊章將未墾旱地額租上則減爲二石中則一石三斗下則一石同已墾熟地併准折錢交納每京斗和麥一斗折收銅錢一百文大米一斗折收銅錢一百五十文維時清查原報未墾及已佃墾荒地尙存八百八十頃五十五畝通飭各屬遵章試辦道光緒十年接奉部議另再妥籌整頓前撫臣邊寶泉復將章程擬定議請將各屬未墾荒地上則額租減爲一石五斗中則一石下則七斗五升俟三年後再行起租均經先後奏明奉 旨允准欽遵在案臣自去歲十一月到任詳查各屬未墾荒地尙存五百三十頃有零應交熟地租課短欠尙多據咸寧高陵咸陽渭南涇陽臨潼等屬佃民迭以招墾民荒地畝屆限升科不納租課營田水旱各地均須分別等則交租折價呈繳計自領墾至今凡膏腴上中等地及有力佃民應交租糧均早交足換照現在短欠額租暨未墾地半皆赤貧佃戶及沙石夾雜下業懇請豁免租課一律發照遵限輸納正賦等情聯名再三稟懇臣以民荒本屬民業招民墾種自無由官收租之理營田係入官叛產定章交租管業蓋默寓變價之例於其中雖兩相比較不無苦樂之分而叛產與民荒原自不同究難以彼例此惟念秦中兵旱頻仍元氣未復農民終歲勤動完納正賦之外兼納租課民力不逮亦屬實情當經批飭督後局

營田所斟酌情形核議去後茲據營後局司道會詳稱查各屬原報營田計至十三年報銷止共已開墾地三千五百二十餘頃劃除高陵華州被水衝刷地一十一頃有零通計各屬已墾而交足額和給照管業有一千六百九十餘頃各屬已墾熟地應完額租歷年已交各邑糧租並折價易銀撥解庫均已分別支用存儲按年造報現在民欠租數除十四年續徵之數不計外共實欠京斗麥十八萬二百餘石長安縣另欠白米一百三十餘石大荔縣另欠沙租銀五千八百四十餘兩核計欠數均屬過鉅近年來嚴飭各州縣遵章催比完納總欠踴躍竊思完租即可撥地永爲己業該佃戶自非有意拖延祇緣民力拮据額租與正糧並納兼顧維艱體察民情不無可憫第自定章以來綜核各屬交過京斗租糧計已二十萬一千餘石折錢易銀共收十七萬餘兩今若竟將未交額糧全行豁免則前後辦理兩歧無以服已交額租佃戶之心如仍照舊徵收而追呼罔應又無以紓現在窮民之力再四籌商惟有酌量核減以示體恤擬請自本年爲始所有已墾尚未給照管業各則地畝應交租糧查明領地先後歷年議定租數分別按糧折價悉照前定章程酌減三成小麥每京斗一斗折收銅錢七十文白米每京斗一斗收銅錢一百零五文現在未墾荒地截至本年春季底止僅存三百五十餘頃皆屬極下之業近年設法招徠無人認墾擬請將應交額租再行酌減上則每畝完租一石中則六斗七升下則五斗仍俟三年後再行起租折

價卽照現定之數一律辦理大荔沙地租銀前經兩次減租均未議及擬請將已墾尙未交足各則沙地按照原章酌減三成每銀一兩祇收七錢尙未招墾沙地一百七十餘頃與未墾旱地事同一律併請量爲議減上則每畝完租銀四錢中則三錢二分下則二錢四分亦俟三年後起租將來徵收時仍照現定核減之章程每兩祇收七錢以免參差如此酌量變通既可少紓佃力亦不致有礙定章等情由督後局司道會詳前來臣覆查無異謹恭摺具奏下戶部議奏○丙戌諭奕劻等奏遵保神機營備操各員並該營管帶官暨海軍內外學堂出力人員各摺片副都統銜營總國勝著以副都統記名坐補浙江鹽運使惠年著不必坐補仍以鹽運使用已革庫倫辦事大臣桂祥陝西鹽法道常瑛均著開復原銜翎頂桂祥並著賞給頭等侍衛常瑛並著以知府記名其單開之芬車等均著照所請獎勵餘依議○諭奕劻等奏各省關應解海防經費期滿請分別勸懲開單呈覽一摺據稱各省關應解上年海防經費及解補歷年欠款有指數全解者有尙未解清者自應查照定章分別勸懲所有業經解清之湖北省及閩海鎮海江漢蕪湖粵海各省關著交部查取職名給予議敘全未補解之江蘇江甯浙江江西等省著查取職名議處此項經費關係緊要卽著該督撫飭司將銀兩迅卽如數撥解毋再遲延致誤要需嗣後各省關務當遵照指定數目按年解清不得任意宕延餘依議該部知道○戊子予故道員吳毓蘭於揚州建祠列入

祀典○己丑李鴻章奏光緒十四年十月接准庫倫辦事大臣安德咨開庫倫地方遼闊劫案頻仍奏請飭調宣化練軍前營馬隊由臺站前往駐防以資鎮懾奉 硃批著照所請該衙門知道欽此恭錄知照前來臣當飭宣化鎮總兵王可陞籌議該軍前營馬隊自光緒十二年由庫倫撤回即移紮口外多倫諾爾迤北經棚一帶緝捕盜賊保衛商民安德來咨正值口外冬防喫緊勢難遽行遠調且臺站水凍草枯沿途應需駝隻能否照數供應該官兵應需加餉等項如何籌備亦須妥細查核方可酌定行期即經咨行察哈爾都統托倫布咨開臺站苦累額駝不敷供差此次宣化練軍出邊須另僱駝隻租賃厰房購備糞薪請於該衙門截贖茶馬盤捐項下撥銀濟用奏奉 諭旨允准咨請飭調並據練餉局司道查照前調練軍赴庫倫設防定章詳請具奏各等因臣查該軍前營馬隊計營官幫辦哨隊官什長正兵親兵伙夫馬夫加夫共合三百五十六員名應分作十起行走以紓臺力每起派官一員勾帶兵夫三十五名需騎駝三十六隻另備運載行糧鍋具軍裝火藥等駝十五隻又厰房一項糞薪足用該官兵長驅沙漠遠戍邊荒其形艱苦自應照案核加餉項俾示體恤除原領薪餉由練餉局循舊籌撥外按出征章程計兵丁二百五十名每名應加月餉扣建二錢每年合銀六百兩又加夫四十名每名支扣建銀三兩每年銀一千四百四十兩又照舊章全營月支不扣建柴草銀八十兩每年合銀九百六十兩又另案加增

柴草自十月至四月每月不扣建銀五十兩七箇月合銀三百五十兩又兵丁每名應給皮衣銀二兩五錢共合銀六百二十五兩連馬棚帳房等項均由局設法籌撥又兵丁伙夫馬夫加夫共三百四十三名應照光緒六年奏定章程由部庫每名按月撥給辦運米糧各費扣建銀一兩五錢每年合銀六千一百七十四兩仍由山練餉局按年赴部預領轉發應用現據該局將夏秋兩季餉項挪措給發其應加各款自五月分起支並據該鎮王可陞先行借款購辦粟米筱麵及口袋繩席裝紮完固分雇牛車駝隻取道商路運赴庫倫另由宣化抽派馬隊百名赴經棚一帶接防卽於五月內調前營官兵由經棚回抵宣化趕備行裝軍伙寬帶行糧該營官郭洪保管帶因沿途乾旱須俟雨降草肥暢行無阻擬六月十六日分起拔赴張家口次第出邊前進仰懇 天恩飭下戶部將該軍辦運米糧各費每年銀六千一百七十四兩先行撥給一年交練餉局委員領回以後再隨時續領俾濟要需至綏防練軍關係緊要未便久役於外應由庫倫自行整頓軍伍俟地面綏靖仍將宣軍撤回藉節經費得 旨如所請行○庚寅諭方汝蒼呈遞安摺將有字摺摺顛倒繕寫非尋常疏忽可比著交部議處○辛卯寬岡等奏查 臣寺額設滿洲署正署丞典簿司庫凡十五缺惟署丞係不分滿洲蒙古按科分名次擬選又查 臣寺例載大官珍饈滿署正二缺係題缺如遇缺出先將一等之滿洲署丞典簿司庫筆帖式擬定正陪出具考語吏部查核與例

相符帶領引 見錄用等語是 寺題選各缺均無蒙古專缺惟署丞由部擬選不分滿洲蒙古是以間有蒙古舉人選授是缺者迨至保列 京察一等遇有署正題缺皆以蒙古署丞例無題升滿洲署正明文礙難保題又查吏部則例內開大部現任蒙古司員曾經保列 京察准作一等者如遇滿洲應題及應行留題之缺准其與滿洲一等人員一體酌量揀選如將該員題補由該堂官奏明指名借題毋庸擬定正陪等語是六部之有蒙古專缺者曾有借題之例今 寺蒙古司員既無專缺可升雖經保列 京察一等亦無題升之階此項人員未免向隅合無仰懇 聖恩准將 寺蒙古一等司員比照六部蒙古一等司員之例遇有滿洲署正題缺與 寺滿洲一等司員一體揀選題升後再經保列 京察一等仍與滿洲人員一體調繁其並非一等人員仍不借升題缺以示限制如此量爲變通則 寺蒙古司員稍資鼓勵與六部借缺定例亦不致兩歧可否 飭下吏部酌核議奏之處出自 聖主鴻慈 上諭寬罔等奏蒙古一等司員升途較隘請援例接升滿洲題缺一摺著吏部議奏○壬辰徐桐等奏本月十六日據 臣院侍講銜編修王懿榮呈稱爲 四庫全書事關文教請俟方略會典兩書告成後懇 恩特飭續修事竊職伏見乾隆朝 高宗純皇帝 欽定四庫全書分經史子集四目所收書籍上自周秦以迄我朝三千餘年聖作明述之跡粲然大備中間恭載 列聖御製全集 御纂 欽定各書半籠天地彪

炳古今漢唐以來文章美富未有若斯之盛者也至我 皇上御極之十有五年時經百載開通日廣文物日新厥有市舶泛來前代流傳海外之書又有乾隆以後通材碩學網羅散失採集逸佚復古再成之書說經補史重注重疏精校精勘之書以及天文算學地輿方志政書奏議私家撰著卓然經世之書層見迭出或先得者殘而重收者足或沿稱者僞而改題者真者據一門後來居上藝數之流晚出愈精若此之類上溯舊例應行繕錄者其爲粹美庶幾前編皆所以導揚盛治恢崇至道千載一時於今爲烈職愚以爲 皇上親裁大政庶事求舊以 聖紹 聖美睿學臻所宜重開新館續纂前書 萬幾清暇藉資 乙覽以今翰林院衙門講讀編檢諸員幾二百人加以後來 恩科選用爲數益夥館閣諸差較之部曹又爲簡易歲糜俸銀季分廩祿仕優則學朝夕論思職亦宜然且近三十年來學術之變亦汲汲矣篇實之風漸微而新學異說紛然競起若不及今整齊百氏失其指歸其爲流弊豈可勝言孔子曰博學於文約之以禮明學術以正之則孟子所謂道揆法守者將在於此此又 皇仁所以繼述 高宗純皇帝之盛心而爲天下治道之大防者也現在方略會典兩館齊開 欽派總裁大臣有日不暇給之勢一俟兩書告成之後可否請 旨飭下掌院學士議定重開 四庫全書館卽院修書不支薪炭不開保獎所修之書一體前例外省採進分派編校各撰提要總裁閱看每成一類輒呈 御覽應鈔應存恭候

欽定將來 國史諸志亦卽藉此取材俟屆三年肇院學士量其勤惰品其高下以爲考課歸入京察事以煩而不費官以修而無曠蓋厚重少文前史所稱此指其人質性而言未聞有不多識前言往行以著其德而能設施燭然足裨實用者造就人材亦在於此惟次第取辦從容就理不涉鋪張自歸實際凡事皆然矧在政體職固不敢造次請 命而致昧於先務之急也冒瀆陳詞誠惶誠恐謹請代奏伏乞 皇上聖鑒等語 臣公同閣看尙無違悖字句不敢瀾於 上聞理合據呈代奏伏乞 聖鑒又奏本月十六日據臣院編修王懿榮呈稱爲臚陳 本朝儒臣所撰十三經疏義請 賜取列學官以光文治事竊維經者徑也易者詩禮春秋昌明博大如日月之周乎天注猶瀉也毛鄭何則杜范廣達疏通如江河之行乎地皆所以綱紀人倫維持風俗異教入而卽湮邪說來而遂化遭時制宜其用無窮是以漢崇師法十博士並置學官隋錄名家五千餘卷同修甲部唐孔穎達奉勅首編正義宋邢昺受詔兼疏衆經斯誠前代之隆規先儒之盛業蓋闢六合整齊百家我 聖朝之有天下也釋教覃敷敦崇經術 列聖建極御纂尤繁稽古同天啟兩大精微之蘊觀文成化定四方億兆之心昭雲漢而爲章廟盼黎以上道上行下效經正民興職伏見自乾隆以來至於今日海內經學各有專家剖析條流發起隱漏十三經說然將備折衷求是遠邁漢唐時則有若湖北安陸儒臣李道平所撰周易集解纂疏江蘇陽湖儒臣孫星

初所撰尙書今古文注疏長洲儒臣陳奐毛詩傳疏安徽績溪儒臣胡培翬所撰儀禮正義江蘇句容儒臣陳立所撰春秋公羊傳正義浙江嘉善儒臣鍾文蒸所撰穀梁經傳補注江蘇寶應儒臣劉寶楠所撰論語正義儀徵儒臣阮福所撰孝經義疏補注山東棲霞儒臣郝懿行所撰爾雅義疏其他經說以博通見長不屬疏義者不在此列所有各書或經進御覽或流布學校可否請旨飭下各直省督撫於各該員原籍所在卽家徵取定本分咨各直省有書局之處詳細校勘刊刻成兩將板片彙送國子監衙門存儲以便陸續刷印頒行直省各學嘉與士林俾資講習元建康道編牒九路鐫全史而命校官朱撫州庫廢冊千箱墨挈書以給多士從此膠庠引重祛金貨漆字之私將來華裔流傳識虎觀鴻都之大國之麻美士之英華何以逾此惟大小戴維四代之文因革殊制左邱明綜五方之史聞見異詞以較他經本爲繁重寶應儒臣劉文淇撰左氏傳正義業專一家事歷三世行將寫定至周禮禮記二書疏義風聞江浙兩省承學之士方事潛研尙屬草稿一俟異日之書局出並令各省學臣隨時疏報由國子監官公同審詳與各前書義出一律查照現案請旨施行職竊以疏家之義志在輔注所從之注請在善經往往衆說紛紜一師墨守侈主奴之迭見任得失之並生然家法嚴而後古義鑒門徑清而後學派正其能久遠亦在於斯惟期諸臣學識兼長野冒既刪僞傳復黜見以博而理愈通知以真而用彌切雖集思廣

益摘據有待於後人而抱闕守殘援據已賅夫先哲至如戴德纂記爰及漢昭比於羣經自爲靡維然劉向目錄業入經篇宋代儒家已稱顯立則有山東曲阜儒臣孔廣森所撰大戴禮記補注援據精深訂虛辨之佚文續康成之緒說所當繫附尾隨如騷之新又如漢許慎說文一書存六書之規闕爲羣經之階梯有江蘇金壇儒臣殷玉裁所撰說文解字段氏注山東安邱儒臣王筠所撰說文句讀釋例最爲賅治譬之杜林訓纂之作入藝略以兼存元度字樣之書儼右經而並立相應請 旨一併飭各該省由印書局刊送國子監此次各經注後依類印行使我 朝諸儒所纂經學小學之書頻水辟雍粹然並陳一臻盛美職竊伏念魏晉而後易無完注書無完經眞贋相參奪僞踵起中更荒廢如權秦燔千百億言無闕閱者不過我 朝 君臣同德千載一時擇瓊鏡以式九圍運斗樞而敷五教何以索隱鉤深精窮奧業存真裁僞藻雪前修大義乖而復昌微言絕而重續符三代同風之盛成儒者逢辰之期迺知神聖化光等百王而立教風雅道著合四海以來同作述之美旣彰太平之望允塞職爲闡揚文治起見謹請代奏伏乞 皇上聖鑒等語 等公同閱看尙無違悖字句不敢矚於 上聞理合據呈代奏 上諭翰林院編修王懿榮呈請續修四庫全書並臚陳本朝儒臣所撰十三經疏義請飭取列學官各一摺著俟會典纂輯告成後由翰林院奏明請旨○甲午張曜奏彙保修培堤埵出力人員分別異常尋常勞績懇請給

獎下部議奏○張之洞奏惠潮兩府嘉應州等地方被水賑撫情形得 旨卽著飭屬妥爲賑撫毋任災民失所○張之洞奏上年冬間經 臣幾次檄飭東西北三江凡有圍基各縣急趁冬晴水涸於向來單薄去年被水處所修築完固並派員會同各屬文武員弁督率紳士籌撥經費倡率民捐妥速辦理務於春水未至之前一律竣事復於本年春間籌款委員豫買應用木椿竹纜等項分儲水道堤隄各縣以備緩急四月中旬省城連日大雨各路漸次加漲 臣慮新築沙土未實卽於是月二十一日乘坐小輪出省親往覆勘督催先溯北江仍由北江還省中途由青政口入閩四會之綏江由新興江口入閩肇慶府城外之支河由三水口入閩高明之支河由官山海口入閩南海之支河所有三水四會高要高明鶴山南海各縣各大圍暨夜奔馳詳加查勘凡沿江暨沿河小輪可通之重要各處均登岸步行察看此外沿岸各圍丹行可親培築尙屬認真卽於二十六日回省現在各圍內禾苗長發彌望青葱續據四會縣稟報四月底晝夜大雨五月初一日該縣上游廣西懷集縣暴漲驟下水長一丈有餘幸各圍基略有坍塌處所均經竭力保護無虞於初三日後水勢漸卽消退若此後晴雨應時夏漲平緩西北兩江各郡縣或可無意外之慮 臣仍分飭員弁督率慎防以免疏虞報聞○乙未予錫珍病假一月○正白旗領侍衛內大臣正黃旗滿洲都統固倫額駙公景壽卒派載澤前往奠醊卹蔭如例並賞銀二千兩治喪○丁酉命奕謨

爲閱兵大臣○命奕劻管理上虞備用處事務○命伯彥訥謨帖管理圓明園八旗包衣官兵並管理烏
 鎗營事務○命本格爲管理行營事務大臣○命晉祺管理善撲營事務○戊戌命晉祺管理奉宸苑事
 務○以載瀄爲正白旗領侍衛內大臣調世鐸爲正黃旗滿洲都統福錕爲鑲紅旗滿洲都統以熙敬爲
 漢軍都統○調希朗阿爲正藍旗滿洲副都統以恩全爲正黃旗漢軍副都統○己亥轉續昌爲戶部左
 侍郎調崇禮爲戶部右侍郎以巴克坦布爲兵部右侍郎○額爾慶額奏查塔爾巴哈臺防營業經添補
 足額改設步隊三營馬隊四旗共員弁勇丁一千九百九十八員名一律支領坐糧共計每歲需正餉銀
 十一萬八千三百一十八兩二分其餘一切款項仍照舊案支發惟各營員弁缺額除原設副將以下等
 缺三十五員不計外按照甘肅新疆巡撫劉錦棠奏定章程應裁去經制外委四員添設千總二員把總
 二員蒙古把總二員額外外委三十名合之原設各員缺共六十七員名至各營員弁應領俸廉薪蔬紙
 張馬乾折色料草等項銀兩照章支領外其公費一項塔城瘠苦情形與新疆南路迥殊自應酌定數目
 以資辦公擬每歲支給銀二千七百兩俟分防設汛後視道路遠近再行切實估計報部查核著理塔爾
 巴哈臺屯防營副將白占春稟請具奏等情前來奴才伏查前任參贊大臣錫綸奏設副將以下等三十
 五員缺係照舊制辦理茲照劉錦棠奏定新章按三營四旗合算所有原設各員缺實屬不敷分布惟有

仰懇 天恩俯念邊疆要地准其裁去經制外委四員添設千總二員把總二員蒙古把總二員額外外委三十名以資營伍而資鈐束並懇 勅部立案俾垂久遠而便遵守下部議奏○庚子 上御乾清宮受賀○倪文蔚奏豫省盜匪日熾請籌撥經費認真緝捕下戶部議奏○倪文蔚奏准甯縣等處失火被災情形得 旨卽著飭屬查明被災戶口妥籌撫卹毋任失所○辛丑予捐資整頓書院前合浦縣知縣候選訓導旌獎○壬寅 上詣 大高殿 壽皇殿行禮○癸卯升奏奏臧印邊事自赫政三月二十一日前赴印營之後倏已將屆兩月奴才屢次遣弁往催據赫政覆函總以英廷印督及駐京公使往覆電商尙無約期確信奴才久駐於此雖中情焦灼然以邊事重大且曾蒙 聖訓徐與磋磨亦惟有靜心等候昨據探卒回報納蕩印營將礮隊移赴白棟一帶是已退剗三站有撤回之意第尙未接印使來文僅據探報所云如是惟納蕩尙有印兵千餘皆境扣多及丁里八甲兩處亦分有印兵屯剗總計不下四千必須會議之後始能促其速撤理合將實在情形由五百里附片具陳報聞○甲辰以候選道高裕源虧欠鹽課革職勒追

秋七月乙巳朔時享 太廟○予衛榮光病假兩月○丁未德馨奏擊獲會匪飭府確審得 旨知道了

卽著飭屬嚴拿在逃各犯務獲究辦以靖地方○懷山奏流民來營辦理情形報聞○張曜奏接據統帶

濟字等營副將黃金得稟稱本月二十五日章邱縣境大寨金王等莊護莊圍埝被水衝入圍埝灌溜以後即將南面大堤一併漫溢堤身三十餘丈立時塌陷等情臣查該處大堤之內有金王等四村莊南傍大堤該四莊之民卽於東西北三面修築圍埝長至十里屢經勸諭該莊民移居堤外該莊民安土重遷守不肯去今水勢洶湧圍埝被衝以致漫過大堤漫溢之水由小清河東流入海所有被水村莊立即委員會同地方官分投賑濟勿任失所該段修防各事原派會辦河防局道員李希杰督率修防應辦工程未能迅速竣事副將黃金得係帶隊防守之員因先搶護齊東蘇家梨行險工以致回顧不及是人力所不逮究防守之未周相應請旨將道員李希杰摘去頂戴副將黃金得革職留工以示懲儆臣每於防營請撥料物加添人夫無不立時批准得以隨時搶護力與水爭總冀全河無患今一隙之疏致被黃流分漫臣督率無方實有應得之咎請旨將臣交部議處俾在工文武倍加警惕此段被水大堤尙未擊動溜勢卽飭李希杰採備料物趕爲堵築並據防河游擊楊傳斌馳報歷城北岸西祇坊民修護埝被水漫溢水勢猛急卽將後面二堤同時漫過幸該段大堤未被沖動應於下游將民埝挖開放水歸河現計全河水勢較之十三年伏汛盛漲之時已多三尺有餘若再有長無消處處有盈滿之患臣惟有督飭在工文武各員及沿河州縣加意嚴防以盡人力上諭張曜奏章邱縣境大寨金王等莊堤埝漫溢現籌

堵鎮請將疎防各員懲處並自請議處等語本年伏汛盛漲六月二十五日山東章邱縣境大寨金王等莊圍埝被衝將南面大堤漫溢並塌陷堤身三十餘丈覽奏殊深軫系卽著張曜督同在事員弁將漫口迅速堵鎮毋稍延緩被災戶口並著分別賑撫毋任失所其搶護不力之道員李希杰著摘去頂戴副將黃金得著革職留工以示懲儆張曜督率無方亦難辭咎著交部議處餘著照所議辦理○張曜奏查本年三四月間青黃不接卽無災區糧價亦復昂貴經臣飭由藩司通飭各屬散放積穀禁止糟坊燒鍋勸諭富戶平糶府縣尙能察看地方情形妥慎辦理惟聞平度州知州許頌鼎於平糶一事辦理不善並州同許彬吏目汪景堯分赴各鄉查驗國糧該州同許彬竟多方索詐肆意騷擾以致民怨沸騰索詐之家地名人名歷歷可指當經藩臬兩司遴派候補直隸州知州彭虞孫前往訪查茲據彭虞孫稟稱行抵平度州查知州許頌鼎辦理平糶先未定章紳富無從舉辦旋派州同吏目赴鄉查封國糧並票傳各富戶來城驗令具結認糶詎州同許彬藉查國糧任意索詐抗而不與者雖自食之糧亦必勒令糶賣間有貿易之家並非囤積之戶亦被恫喝出資贖款繫累民間怨語甚深知州許頌鼎辦理平糶士民初無問言迨該州同藉端索詐善政轉爲虐政吏目汪景堯是否分用贖款尙無證據等語並據該管道府稟揭前來伏思職官詐贓擾害閭閻若不澈究嚴辦不足以懲貪邪相應請 旨將平度州州同許彬先行革職

發交臬司督同委員嚴密擬辦平度州知州許頌鼎於地方公事未能悉心經理委任非人有無故縱情
事應與吏目汪景堯一併撤省查辦再據委員彭虞孫稟稱許彬索詐喊款半係商人捐贖通判之許守
謙爲之經手查許守謙平日出入衙署聲名甚劣自應歸案審訊 上諭張曜奏貪官藉端索詐請旨懲
辦一摺山東平度州知州許頌鼎辦理平糶派委州同許彬吏目汪景堯赴鄉查驗囤糧許彬輒藉差任
意索詐喊款疊繁以致民怨沸騰平度州州同許彬著先行革職從嚴審辦許頌鼎有無故縱情事並汪
景堯是否分用喊款均應確切訊究著一併撤省查辦餘著照所議辦理該部知道○張曜奏 臣於六月
初六日謹將四五兩月拾護上下游險工情形奏報在案兼旬以來水勢逐漸增長自十七日以後六日
之間如歷城濟陽爲河身最窄之處陡長至九尺數寸其餘上下游河面稍寬之處亦長至七八尺與原
長之水合計長至一丈六七尺不等 臣於工次日接員弁防營馳報極險之工下游則濟陽章邱齊東青
城補臺等縣上游則東阿長清齊河歷城等縣共計二十七處或係壩壩衝動墊陷或係堤埝被溜刷塌
更有向非險工忽然溜勢滾刷頃刻成險上下千里有請添人夫者有請運繩橋料者自春及夏沿河
採買橋料至五千餘斤之多現當新料尚未收割舊料既已買罄最險之處水距堤埝之頂不過一尺數
寸從前黃河每於三四月間桃汛之時即不免有漫口水勢因而旁洩伏汛盛漲不至如此之盛今以窄

狹之河全行堵塞完整專憑千里堤埵東流入海力守之難無待瀆陳 天聽惟下游南岸大堤二百八
十里間節節生險如鑲帛等工更需熟手勇丁已飭河防局道員張上達於上游防河各營挑派勇丁六
百人前往幫工以期得力報聞○諭譚鈞培奏土匪滋擾當即殲除出力員并懇予獎勵一摺雲南甯州
等處土匪羅公大勾結匪黨肆擾各地勢頗熾張譚鈞培派員勦捕者甯河縣事通判王治善督率兵練
將逆首擒獲正法辦理尙爲迅速即營飭屬搜捕逆匪務獲懲辦毋留餘孽所有被擾村寨及逃出難民
務當妥爲安撫毋任失所在事出力之通判王治善著俟補缺後以直隸州知州在任前先補用千總邵
鳳章著賞加守備銜以示獎勵餘著照所議辦理該部知道○己酉陳彝奏安省地勢大江中以來江兩
岸皆山田望澤恆殷而平田又防多雨臣前次片奏滁州廬州乾旱情形嗣接稟報幸已得透雨而
五月下旬以後迭次滂沱山水下注宿松太湖潛山懷甯等縣低窪地方多遭漫溢又據稟報前來當擇
情形較重之處委員分投馳往確切查勘如有衝破圩埂淹及禾苗傷損人口之事著趕緊設法疏消竭
力保護應行撫恤准其挪款墊辦一面由省撥還毋得失所其有驛路淹阻之處由地方官另備扁扁接
遞報聞○諭定安等奏紳士捐助賑款爲數甚鉅懇恩獎勵一摺上年奉天被水成災民情困苦經上海
紳士袁天錫等代籌賑銀委員前往分投散放並購運米石接濟平糶未及一年集款十餘萬兩實屬勇

於爲晉深堪嘉許候選道袁天錫前廣東候補道張鴻祿二品封職施晉昌候選直隸州知州經元晉候選同知葉成忠同知銜徐克敏江蘇候補知縣葛繩孝同知銜陳渭候選縣丞朱佩珍直隸候補直隸州知州謝家福浙江候補知府王松霖福建試用同知陳德薰河南候補知縣楊廷果吉林差委通判姚嶽松直隸候補知縣楊培選用巡檢阮可均州同銜李拱宸候選府經歷周家枏均著定安等傳旨嘉獎所請將捐資各員援照江皖賑捐新章獎敘之處著戶部議奏○卞寶第奏江西客幫民人向在建江駕船爲業上至邵武府光澤縣中越延平下達建甯府崇安縣船多人衆好鬪喜爭刀鎗器械幾於無船無之兇惡之徒或刦奪行舟或殺掠孤客福建營制內河水師礮船先有九十八號連年裁兵節餉僅存三十號駐巡水面一千餘里每船舵工水手兵額共六名船又多年朽壞難資巡緝下府興化等屬在建江營生者亦有鴨母船多隻遇有客商裝運鹽貨與江西幫船爭戰互鬪十餘年來殺傷不下數十百命官亦從未懲辦以致肆行無忌上年十二月十三日據署延平府順昌縣知縣程霖稟報初三日該管大幹地方有江幫因攬鹽與下府人口角爭鬪殺斃下府三人下府糾合多人殺斃江幫十三人緝兇訊辦等因臣查彼此互鬪致斃十數命之多當飭營縣嚴拿兇要各犯務獲究辦嗣因日久無獲將署知縣程霖摘頂留緝茲於五月二十五日據署順昌縣知縣王國瑞署順昌協副將朱長陞先後稟稱探聞江西船有

五十餘號約有千餘人豎有普天佛祖旗號另有八卦小旗中寫天地字由邵武開駛擊口提督劉端冕諭阻不住順流而下聲稱往大幹報復前仇誠恐藉端起事臣電飭延建邵道恩夏轉行擊口防營恪靖威旗提督劉端冕延平防營恪靖副中旗提督王紫田改旌爲營會同順昌協副將朱長陞從速截拿並准格殺勿論二十六日據署知縣王國瑞稟報二十一日探聞江西船泊在離大幹十餘里之水口寨一帶河干當卽會同副將朱長陞往阻不聽二十二日該船連幫徑至大幹該縣等仍向諭止江西人不服彈壓奇將對岸下府會館焚燒並竄赴富屯白石等鄉燒毀下府客民住屋兼有殺傷人命勢甚凶猛該縣等回城辦理城防請派大隊前來等語臣因延建邵三府茶市正興外來游民數十萬人誠恐匪黨勾結勢成燎原且江幫下府連年仇殺亦須大加懲創非厚集兵力不足以資鎮懾隨調駐紮長門統領海防諸軍福甯鎮總兵曹志忠督帶霆慶前營總兵廖得勝恪靖中營副將鍾紫雲所部弁勇晝夜赴剿並經陸路提督孫開華派令摧勝右營提督蕭宗雲由龍溪取道赴順昌協剿辦又派摧勝中營總兵李春海駐軍延平以防上下游匪船接應均於十六日拔營前進六月初一日接延建邵道恩夏電稟連日江西幫肆擾十三鄉至二十六日分幫泊富屯河經提督王紫田副將朱長陞都司黃得陞等迎頭截擊該匪拒捕當卽格殺數名我兵被傷一人二十七日王紫田等拔隊進剿十三鄉等處捕獲匪犯二十餘名

我兵受傷二人臣卽電催各軍前進當場所獲各匪訊明正法計期曹志忠等各營初二三日當可到地不難一鼓撲滅惟匪船多駛由壑口經過下駛防營提督劉端冕不竭力堵截及至大幹燒殺順昌縣營又不當時捕拿致令肆擾各鄉咎無可辭前署順昌縣程森於械關多命重案延不獲犯究辦雖經臣將該員摘頂留緝不足蔽辜相應請旨將壑口防營提督劉端冕署順昌協副將朱長陞署順昌縣知縣王國瑞前署順昌縣知縣准補政和縣知縣程森一併交部照例議處得旨劉端冕朱長陞王國瑞程森均著交部議處仍著督飭各營趕緊拿務期迅速撲滅毋任蔓延○辛亥諭前據托倫布等奏察哈爾牛羊羣控案兩造情詞各執當令將副總管鄂呢巴圖等撤任提案訊辦茲據該都統等奏鄂呢巴圖等並不聽候查辦先後私行仙往及潛來京城雖保非畏罪逃避鄂呢巴圖達米林扎普巴特瑪那色博克扎普等均著先行革職並派順天府五城御史一體嚴拿解交該都統等歸案審辦該衙門知道○壬子慶裕因病請解任允之○以錢應澍爲宗人府府丞○吳大澂奏沁黃兩河陡長報聞○吳大澂奏節交伏汛鄭州壩工防護平穩報聞○甲寅以裕祿爲盛京將軍○劉秉璋奏鄉工捐輸銀兩匯解山東濟用下戶部知之○李鴻章奏准戶部咨開光緒十五年正月二十七日大婚禮成二月初四日欽奉恩詔由部奏請蠲免各直省光緒九年以前民欠及因災緩帶徵錢糧又光緒十五年三月十五日崇上

慈禧端佑康頤昭豫莊誠壽恭欽獻崇熙皇太后徽號三月十六日欽奉 恩詔由部奏請豁免各省光緒十三年以前民欠及因災緩帶徵錢糧奉 旨依議欽此遵卽行司查辦並先明白曉諭茲據藩司松椿詳稱直隸除民糧地外向山民佃各項旗地完納官租與民糧事同一律歷屆查辦豁免民欠錢糧均經奏蒙 恩旨將民欠各項旗租一體豁免光緒十年豁免五年以前民欠錢糧案內欽奉十年九月二十四日 上諭李鴻章奏請豁免積欠旗租一摺直隸民佃旗地官租與民糧事同一律近年災欠頻仍佃民困苦著加恩將直隸各州縣光緒五年以前民欠各項旗地官租並各案補徵銀兩實在民欠者一體全行豁免等因欽遵在案今光緒九年以前民欠錢糧又光緒十三年以前民欠錢糧先後蒙 恩豁免所有佃種旗地之民近復頻遭災歉情形困苦望澤同深請援案奏請前來 臣覆查無異相應仰懇天恩俯准將直隸各州縣光緒九年以前並十三年以前實在民欠及因災緩帶徵各項旗地官租並各案補徵銀兩一體豁免益足以廣 皇仁俟奉 旨後卽通飭確查數目核實辦理仍先刊刻謄黃徧行曉諭其微存在官者勒限提解不准絲毫朦混得 旨允行○乙卯以陳鳳樓爲徐州鎮總兵○丙辰調張之洞爲湖廣總督以李瀚章爲兩廣總督○戊午以松椿爲漕運總督○以裕長爲直隸布政使○杭州將軍恭鏜卒卹廕如例○以古元爲杭州將軍○以象山縣印委王宗丞等設卡抽盤辦理不替降革

有差○已未 上詣 奉先殿 壽皇殿行禮○庚申諭翁同龢奏懇恩假回籍修墓一摺翁同龢著賞假兩箇月回籍修墓該尙書日侍講帷深資啟沃一俟修墓事竣著加恩賞給馳驛回京○張曜奏爲州沂水被雹損禾發賑補種報聞○張曜奏 臣前因青黃不接之時糧價昂貴民食維艱飭令各州縣禁止燒鍋釀酒以免耗損五穀各州縣卽據稟報均經遵照辦理糧價因而稍平現在雖已麥收而山東豐稔之年尙須販自鄰省始敷民食燒酒耗糧太甚一時未便弛禁惟應納酒稅銀每年二千一百三十兩今既禁令停燒自應將本年稅銀暫予寬免如果以後連年收成豐稔再飭酌量弛禁下戶部知之○辛酉 上詣 奉先殿 壽皇殿行禮○命載灃恭詣 定陵行禮○壬戌唐炯奏 臣前奏明於貴州威寧查勘礦苗推廣開辦旋據東洋礦師山田欽一勘得距威寧州四十餘里西貢山礦苗甚旺業於五月間飭公司招集砂丁設廠開辦伏查威寧州銅廠自嘉慶初年卽已衰竭每年辦銅僅二萬斤抽收課銅二千斤所有鼓鑄之銅皆係委員赴滇採買現在推廣開辦不獨運道近便於貴州將來鼓鑄亦屬有益惟甫經施工又係新山見效至速亦須年餘應納課銅仰懇 天恩准自光緒十七年爲始照例上納以示體恤至該州衙門如有密索陋規等事由 臣查明咨商貴州撫 臣嚴行禁革用紓商力而肅銅政得 旨如所請行○唐炯奏雲南辦銅向因工本不敷所煎銅斤悉係尖圓塊半以致沿途盜賣掉換種種弊端

不可窮詰招商局現復扣收廠欠只令仍舊惟飭公司仿照貴州鉛磚式樣一律改鑄銅磚編列字號於銅面篆刻年分公司廠名斤重等字樣以歸整齊而杜諸弊業經煎煉陸續自廠起解茲據公司稟稱甫經改鑄銅磚一切配合鑪火須一二月後始能熟練迅速現在廠地瘟疫盛行鑪頭砂丁染患甚重不能施工雖施藥醫治一時尙難痊愈又所獲礦砂因入山未深礦質尙薄鑪火配合亦未得法以二百萬之礦砂僅能成銅十萬斤折耗過多現雖趕緊攻採一面煎鑄本年恐只能湊解五十萬等情前來臣覆查無異除仍飭趕緊攻採煎鑄不得稽延外理合附片據實陳明下戶部知之

甲子卡寶第奏江西幫船匪徒聚眾滋事在順昌縣屬大幹等鄉焚燒房屋殺傷人命臣當將派營往捕大概情形馳奏在案續據管帶恪靖威營提督劉端冕卽武營參將謝尙文稟稱該船匪等糾同大富村地保江西人楊斑虎卽王斑虎率眾滋擾府豐永惠河墩各鄉殺人放火無所不爲二十六日匪船晚泊富屯河邊該提督等會同督帶兵勇於三更時突然進剿該匪拒傷官兵三人該提督等放火彈燒其船隻殺死及淹死者約百餘人生擒三名餘皆狂奔四散追獲匪首吳富明李有生鄭登元胡先喜四名匪黨楊雲峯邱海嵩該時保三名經順昌縣知縣王國瑞訊明吳富明係糾匪首犯李有生鄭登元胡先喜楊雲峯邱海嵩該時保或督旗營陣燒殺或在船主謀均屬法無可貸又據恪靖副中營提督王紫田署

建寧鎮總兵王正和稟稱於二十九日率同副將朱長陞等追剿聚散匪徒至泉後山該匪等在山蜂擁喊殺該提督等督隊迎擊斃斃十餘名擒獲執八卦旗縱火焚掠之余東南呂貴庭二名並匪首楊斑虎卽王斑虎該匪等紛紛越山逃竄又順昌縣拿獲哥匪王乾業帶有紅布小旗訊係聽從湖南范立太入哥老會卽入江西船幫往各鄉燒殺以上四名與吳富明等七犯均卽訊明正法現時各匪逃匿九龍山等處必須將首要各犯搜捕淨盡以免復出旬結滋擾順昌一帶均係汀州興化等府客民占住落業與江西人爭鬪多年讐讐太深亦須乘此兵威將兩處客民刀鎗器械盡數搜繳並勸諭兩縣前嫌所派勇營一時尙難撤退附近順昌之洋口等鎮搬徙紛紛近見兵力已厚多已安堵得 旨知道了卽著飭屬認真搜捕逸匪毋留餘孽以靖地方○乙丑諭巡視南城御史鳳英等奏遵保拿獲盜犯出力員弁並副指揮白荃請抵銷參案縣丞馬濟源聲明捐案各摺片著該部議奏○戊辰諭稽查興平倉御史楊晨奏匪徒在倉滋事拏獲請交部懲治等語所有拏獲之王四海繆大帥領二名著交刑部嚴行審訊○諭軍機大臣等有人奏道員龔壽圖前於光緒六年在上海設立機器織布局招合股分銀四十萬兩至今十年迄未開辦去年忽稱資本虧折改由龔壽圖經理如不續加銀兩前案作爲廢紙以致物論譁然請飭查辦等語各省招合股分原期易於集款以裨商務若如所奏各節假稱虧折蓄意誑騙將來招股勢必

觀望不前實屬不成事體著會國荃等確切查明應如何設法勒限清釐以恤商虧而儆效尤之處著卽據實覆奏毋稍徇隱原片著鈔給閱看將此諭知會國荃剛毅並傳諭黃彭年知之○己巳 上詣壽皇殿 建福宮行禮○會國荃奏聲明南瑞等船支款不能裁減下兵部知之○會國荃奏蘇州賑捐展限兩月得 旨允行○繼格奏同文館學生三年考試請給予繙譯生附貢生監生允之○庚午陳彝奏皖北被水災區辦理工賑完竣報聞○陳彝奏建德縣民徐泰等開闢衙署審明定擬下刑部議奏○諭張曜奏齊河堤埝漫溢請將在工文武各員從嚴懲辦一摺本月十三十四等日山東齊河水勢盛漲張村等處堤埝先後漫溢過水十分之二由徒駭河入海在事各員未能實力搶護自應嚴予懲處候補副將張永洪著卽革職從重發往軍臺効力贖罪候補知縣張遇春游擊李春意都司楊春貴均著卽行革職齊河縣知縣王敬勳著卽革職留任副將戴守禮著革職留工以示懲儆所有被水村莊著該撫飭屬妥爲撫恤並將漫溢口門迅籌堵合毋稍延緩餘著照所議辦理該部知道○辛未獎辦理皖北賑務官紳劉瀚等○卹陣亡大沽協外委張義○壬申沈秉成奏永甯州地方匪徒結會緝拏懲辦得 旨知道了卽著嚴緝逸犯務獲究辦○予碭州殉難紳士蔣組綬等合族二百餘人總祠列入祀典○沈秉成奏臣抵任後察看廣西地瘠民多曠土較廣膏由民情游惰而不勤亦由官吏教勸之不力遂相謂邊地不

宜種桑臣查閱案卷前於光緒七年三月初十日奉 上諭詹事府右庶子周德潤奏農桑爲天下大利而桑之利又倍於農廣西地方於蠶桑之利尤爲重要等因欽此仰見 皇上軫念民依敦崇本業之至意莫名欽感臣生長西浙熟悉農桑之事因卽訪地利察度土宜並詢及前此辦理情形何以旋興旋廢未見成效遂審其作輟之故抉其利弊之原因通飭各州縣查察境內何處宜桑有無曠土兼飭其查明種植棉花茶樹及各項樹果以廣物產而盡地利不得稍涉敷衍致成空談並刊發蠶桑輯要及種桑育蠶譜等書飭藩司馬丕瑤臬司張聯桂鹽法道秦煥候補道沈康保在省城設立官蠶局委派善後局提調候補知府羊復禮候補知縣梁思溥會同寄籍紳士兵部主事謝光綸購買廣東浙江兩省桑秧十數萬株於去冬就官荒各地先行開墾栽種五六十畝今年春夏間雨水調勻柔條悠揚綠葉沃若蔚然可觀邊徼小民始知莊陌僻壤皆能植藝不分肥瘠無害穀蔬乃各相問慰有踴躍興辦之機遂多方購置養蠶器具及繅機等物並僱募浙粵工人教以植桑飼蠶之法曲植蠶簋之器煮繭抽絲之事且官爲買桑收購給以價值俾民知有利可圖官爲設機僱匠紡織綢緞俾民知有效可觀旋據各州縣稟報分別察核檄飭開辦其請領桑秧各州縣概由局一律給發並頒發蠶繅絲器具以爲程式新出絲綿爲數有限所有西省沿途關卡釐稅暫行豁免僅收落地稅以冀減輕成本銷路暢通又慮經費不敷由藩司

辦歛發商生惠以資周轉而國久運從此推行漸廣成效可期若能經理破除成見實心實力永遠奉行雖邊省向乏蠶桑斷無不能興辦之理茲據善後局司道會詳請奏前來臣伏查廣西自兵燹各災之後元氣未復土地瘠薄物產不饒遂至貿易稀少籌捐未能暢收閭閻貧窮司庫亦無儲積上下空虛不能自立專恃協餉以給軍需忝撫是邦竊深悚惕因思欲救貧民必先收地利欲收地利必先種植以立之程藩司馬丕瑤前在山右興辦蠶桑教民織紡著有成績臣交卸之後藩司樸實公忠愛民如子必能爲粵西蔚興大利徧及遐陬從茲野無隙地戶少閒民化惰爲勤易貧爲富數年之後家給人足其於國計民生實有裨益報聞○癸酉魏光燾奏古城地當孔道形勢扼要前經撫臣劉錦棠會同陝甘總督臣譚鍾麟烏魯木齊都統臣恭銳奏請修築城署將奇台縣治移建該處古城巡檢移置奇台兼管驛丞事務奇台縣典史應隨印官移駐經部議奏奉 旨允准撫臣劉錦棠當即欽遵辦理飭派防營幫築新城以便移建嗣經奏准將烏魯木齊巴里坤滿營歸併古城即以新城作爲滿營奇台縣暫仍舊治上年滿營遷竣該處商賈輻輳戶口殷繁彈壓撫綏均關緊要仍查照原奏飭奇台縣及典史並古城巡檢以次移駐用資治理其奇台縣衙署倉廩監獄飭於領隊原駐舊城內酌量修理俟該縣移駐後再將城垣陸續籌修奇台巡檢卽就該縣舊署以資辦公各在案茲據兼理布政使兼按察使銜鎮迪道恩綸詳據奇台

縣知縣劉澄清報稱該縣已於光緒十五年四月初十日率同典史移駐古城巡檢亦於四月十五日移駐奇台轉請奏咨前來臣覆查無異再古城巡檢既移駐奇台請治兼管驛丞事務所有原用印信應即送部查銷轉飭藩司刊刻鈐記給領啟用相應請 旨飭部換鑄奇台縣巡檢銅印一顆由臣咨領轉給俾昭信守下部知之

八月甲戌朔張曜奏濮州等處一帶被水漫溢請將參將張仕忠摘頂得 旨張仕忠著摘去頂戴仍嚴

飭趕緊搶護險工並責成在工員弁力防金隄毋任再有漫溢○張曜奏隄埝漫溢以後賑撫情形報聞

○總理海軍事務衙門奏光緒十五年四月初八日欽奉 慈禧端佑康頤昭豫莊誠壽恭欽獻皇太后

懿旨前因籌議鐵路事宜諭令沿江沿海將軍督撫各抒所見以備采擇嗣據陸續覆奏詳加披閱其偏

執成見不達時勢及另籌辦法尙未合宜者毋庸議外張之洞劉銘傳黃彭年所奏各有見地而張之洞

所議自蘆溝橋起經行河南達於湖北之漢口鎮遠爲四段分作八年造辦等語尤爲詳盡此事爲自強

要策必應通籌天下全局海軍衙門原奏意在開拓風氣次第推行本不限定津通一路但冀有益於國

無損於民定一至當不易之策即可毅然興辦勿庸築室道謀著總理海軍事務衙門即就張之洞所奏

各節詳細覆議奏明請旨張之洞劉銘傳黃彭年摺各一件均著鈔給閱看欽此臣等恭摺 聖慈舉長

駕遠馭之閎謨與執兩用中之深指灼然於明詔之中曷勝欽服當卽公同閱看該督撫等三疏劉銘傳欲由津沽開至京師黃彭年欲先辦邊防漕路緩辦腹內及沿江沿海各省而試行於津通與臣衙門原議略同惟 慈旨令就張之洞所奏各節詳細擬議自應將津通豫鄂樞衡緩急分別確陳以備 慈衷裁斷查西洋興辦鐵路以幹路爲經以枝路爲緯有事則以路徵兵無事則以商養路故能歷久不做國富兵強而官民交便就五大洲言之宜於西洋宜於東洋豈其獨不宜於中國就中國言之或云宜於邊方或云宜於腹地豈其獨不宜於臣衙門奏准之津通等統籌天下大局津通則縱東南一正幹也水路受沿海七省之委輸陸路通關東三省之命脉豫鄂則縱西南一正幹也控荆襄達關隴以一道扼七八省之衝初意徐議中原而先以津沽便海防繼以津通擴商利區區二百里其關係與豫鄂三千里略同固將以開風氣而利推行也今張之洞亦設爲津通五宜審議其中所慮各節臣衙門前奏固已剖析無遺無煩再爲辯論惟事關創始擇善而從臣等亦不敢固執成見津通鐵路應卽暫行緩辦第由津沽至閩莊已成鐵路前因竭力催工商股難集連津通勘路訂料等費曾以五遊輕恩陸續借用洋欸一百二十餘萬臣衙門十三年二月原奏本有商股一時不能多集官爲籌措之語本年正月又奏明罷津通之路斷難再招商股以清洋債而事非辦理不替亦無可著落追賠勢須戶部動撥正欸等語今津通

緩鐵路短源枯出多入少似宜稍加體恤免致失信外人惟爲數甚鉅臣等未便請撥正帑查輪船招商局從前創辦時各省籌發官款除已陸續措還外現尙存銀五十七萬零內多閒款可備撥用茲津沽鐵路洋債無著應懇 恩准其儘數提用於明春到期緊要洋款先行清還尙屬以公濟公其餘不敷銀兩現與商妥展期竊思工捐一年限滿應即截止但此項捐例本因海防而起應請 慈旨仍改爲海防捐俟工捐滿再限一年由各省藩司收解臣衙門並隨時咨報吏戶等部其收捐條款銓補章程悉照鄭工事例辦理臣衙門遇有海防船礮等需酌量動用亦准借撥以償海路洋款俾北洋運兵之路不至中廢其津沽養路之需卽由 臣鴻章督飭公司隨時竭力撙節設法維持若令遵照原奏由唐山接造至山海關以備畿防調兵運械呼應靈捷此路商貨稀少集股甚難應俟帑力稍充或捐項踴躍再行奏明撥助興辦妥議詳細章程至由蘆溝經河南達漢口攷之地志約三千餘里張之洞奏稱南北二千里外自係錯誤造路愈長需款愈鉅該督請分爲四段八年造成亦頗詳盡顧其意以督鐵造軌爲主僅首段酌購洋料勘工期於財不外耗按之寶不能行查光緒九年冬間總理衙門函商管撫議開鐵礦時張之洞曾寄鐵石由 臣鴻章飭局考究情其煉法未精中多雜質各國造軌現皆由鐵易鋼必以硬鋼受重壓而不損軟鋼受重壓而不碎者爲上故奧軌脆不耐寒俄軌鬆而易陷每合國產而購自英廠該督謂土

煉雖遜洋鐵亦足濟用實非驚論西國中等煉鋼鐵鑪全副約需銀一百四十餘萬兩正定清化分設兩鑪約需銀二百八十餘萬兩非先購洋軌以造幹路則機鑪不能運至正定清化非由正定造成通孟縣平定之枝路由清化造成通澤潞之枝路則鐵石不能運至正定清化就蘆溝至正定之幹與正定至平定之枝計一千餘里又由懷慶清化至澤潞枝路亦數百里必須購軌先成方能造端謀始西洋煉鋼之事約須十二廠一曰生煤廠二曰熟煤廠三曰生鐵廠四曰熟鐵廠五曰鐵闌干鐵條廠六曰純鋼廠七曰改鑄銅鐵鋼器廠八曰小鋼鐵事件廠九曰鐵鍋廠十曰鋼軌廠十一曰鑄輪廠十二曰機器廠今未得以鐵造路之益先苦以路運鐵之勞未儲撥帑造路之資先謀集股采鐵之費勢必經年累月勞擾無成況現在晉鐵價已貴於洋鐵不能暢銷若用洋法以煉晉鐵則事物繁費價本益昂臣等再四籌商擬再購用外洋鋼軌以歸省捷俟幹路既成接造枝路然後開采晉礦運機煉鋼以爲推廣他省鐵路之用至鐵路段落則必以漢口至信陽爲首段層遞而北爲最合算何以言之創築鐵路買地購料之費有定一切運脚則視道之迂直遲速爲定鐵路所用以鋼條墊木碎石爲三大宗均極笨重陸運民車多行百里則增價數倍多行一日又增價數倍辦理愈遲則員升工役之費因之遞加若蘆溝達正定一段節節陸運繁費實多但在臣鴻章轄境以內艱鉅所不敢辭今擬改爲蘆溝漢口兩路分投試辦逐節前進

程功較速漢口地濱大江輪帆如織購料既便迫路成而前途需用木鐵石等項卽由輪車轉運斯用費省而成本較輕又漢口至信陽民物殷阜鐵路造成一節卽收一節運貨之利商股或易招徠通盤籌計首尾兼營此實至善不易之策也惟是工大費鉅難成張之洞已明言之而所估銀數似由約略臆揣必以親歷已辦者爲定衡查三千里之路就津沽造成之價估之其路雙軌佔地寬七尺連取土共須佔地二十丈每一里路須佔六十畝每畝約價銀二十三兩是爲購地之費造路一里合銀七千三百十二兩有奇是爲設軌之費自漢口至蘆溝約三千里其購地需十八萬畝約共需銀四百二十餘萬兩其設軌之費約二千二百餘萬兩中間經過大川在直隸境內者十五曰琉璃河曰拒馬河曰北河曰雹河曰漕河曰府河曰唐河曰澆河曰新樂沙河曰滋河曰滹沱河曰趙州沙河曰沙河縣之沙河曰洛河曰滎河在河南境內者九曰漳河曰衛河曰淇河曰黃河曰賈魯河曰賴河曰沙河曰汝河曰淮河其在湖北境內者二曰德安兩河曰孝感河凡二十六水寬或十餘里或二三里其餘小河支港尙不在內所需大鐵橋或十餘萬或五六萬不等約計畝價軌費及造橋經費非三千萬兩不能竣工較張之洞原擬一千六百萬數幾倍之若執定由蘆溝一路順行而南其工費更不止此至於籌款之法當以商股官帑洋債三者並行始能集事津沽公司本無股商巨賈除酌留海路經理外止能兼籌蘆溝創辦事宜其漢口一

路自應廣招紳富別建公司俟直撥接連後再行合併張之洞原擬成各省藩運兩司關道以印票股單勸集雖未必速有成數但能嚴禁苛勒亦可參用第非確著成效商富斷難信從此事既爲自強要策似需官帑接濟應隨時由臣衙門酌量請撥以速事機其商股帑力不足則尤以洋債爲挹注之資張之洞原奏亦稱請援照前案暫借商款墊解以資周轉原非必不可行俟開辦有期再行酌借撥用總之鐵路爲今日利國利民之大端經臣衙門與各疆臣反覆推求實已無義不搜無微不至今議津通而先辦漢口蘆溝兩頭並舉四遠不悖以爲經營全局之計循序漸進之基庶幾有益於國無損於民事出萬全決可毅然興辦儼蒙 聖心審定應請 簡派公正廉明熟悉洋務之重臣招集公司嚴定章程妥爲經畫漢口距信陽州六百八十里蘆溝距正定六百里無論或借或撥應先集款一千萬兩俾令勘路定料庶免停工待款並懇責成直鄂豫三省督撫曉諭紳民毋得阻撓滋事果能內外一心官商合力十年之內成效可期以開中國萬世之利以杜四裔環伺之謀大局幸甚 上諭奉 慈禧端佑康頤昭豫莊誠壽恭欽獻皇太后懿旨總理海軍事務衙門奏遵議通籌鐵路全局一摺據稱照張之洞條陳由蘆溝橋直達漢口現在先從兩頭試辦南由漢口至信陽州北由蘆溝橋至正定府其餘再行次第接辦並臚陳籌款購地各節所奏頗爲賅備業據一再籌議規畫周詳即可定計興辦著派李鴻章張之洞會同海

軍衙門一切應行事宜妥籌開辦並派直隸按察使周馥河道潘峻德隨同辦理以資熟手此事道端宏遠實爲自強要圖創始之際難免羣疑著直隸湖北河南各督撫剴切出示曉諭紳民毋得阻撓滋事總期內外一心官商合力以藏全功而裨至計餘均照所請行將此各諭令知之○丙子移雲南白鹽井大使駐橋後井○丁丑廣西巡撫高崇基卒賜卹如例○戊寅祭社稷壇○譚鈞培奏昆陽等州縣河堤衝塌委勘賑撫得旨卽著飭屬妥爲撫卹毋任災民失所並將河堤趕緊挑修以衛農田○己卯允怡親王載敦暫開差使調理○以馬丕瑤爲廣西巡撫張聯桂爲廣西布政使○劉秉璋奏瀘州火災官商賑捐銀數報聞○以守備劉聯陞贛興世職革職嚴辦○庚辰命載漪爲閩兵大臣○劉秉璋奏遊擊銜武舉覃會川違禁私抽秤息請斥革審辦得旨如所請行○劉秉璋奏世職梁國棟砍傷旗官清聯身死請革鞫審辦得旨如所請行○允張曜請折給旗兵實銀○辛巳以秦煥爲廣西按察使○調劉盛休爲河南河北鎮總兵崔廷桂爲河南南陽鎮總兵○諭志勳之子麟光著繼與榮壽固倫公主爲嗣加恩給予固倫額駙品級○以那爾蘇爲鑲紅旗蒙古都統○以本格爲鑲黃旗領侍衛內大臣○壬午以載澄爲內大臣○予故記名提督蘇元章照軍營立功後病故例賜卹○王文韶奏請立霆軍等營繼嗣允之○以捐助督賑予職員高正甲故父高舒文等旌獎○癸未上詣泰先殿壽皇殿行禮○

命汪鳴鑾散議查勘 昭西陵 孝陵 景陵 裕陵 定陵等處應修工程○陳彝奏竊惟政在養民古今不易而帶被水撥賑得 旨知道了著卽分別妥爲撫卹毋任災民失所○陳彝奏竊惟政在養民古今不易而無業之民欲自遂其生而不得其待養於上爲尤急焉蓋博施濟衆聖人猶難倘經理不得宜將徒以長游惰之風而良民仍不被其澤此迂闊之論所以難行而因利之法洵爲有利無弊所當上陳 聖主之前也大抵肩挑背負之民得錢數千以爲資本每日小貿可以餬口無如資本無出而爲富不仁之徒又從而盤剝之既取其倍稱之息又迫以至促之期數月之間已收一本一利輾轉賸削民困彌深不甘於凍餒卽流於盜賊其所關甚非小也因利一局卽因其術而反用之其法釀錢數百千或數十千立爲一局借給貧民酌用司事以任其收放稽查核算之事來借者必有保保必以鄰近恂謹之人其人之不可借者有十不借之法嚴其始所以要其終也既借之後每日還白分之一五日一送百日收清不復取息其前之還本如期則下屆復借與之旋借旋還故其成本不費旋還旋借故其爲利也長以借之名爲助之實故勤儉之民需其餘利而貧民亦無所利於其間此所以爲善也其所難者司事薪水歲有所需不若成本之可以周轉又肩挑背負之生計常在人煙稠密舟車往來之地荒僻小鎮勢不能行此則事之無可如何者然計一歲之中一局之內貧民之得計者蓋亦不少矣此事起於蘇省之揚州鎮江等處臣

在鄉里甚知其事比蒙 恩來皖知前大學士左宗棠督兩江時嘗下其法於通屬而奉行者尙少因復
諄切勉勵與官吏紳耆謀之有前已舉行而復爲擴充者有已行旋廢而重爲振興者有遵用舊法者有
參以新意者合計通省大半辦有就緒其中規畫妥帖可期久遠者如安慶府屬則懷甯桐城及桐城所
屬之縱陽湯家溝等處徽州府屬則歙縣休甯及歙縣所屬之街口巖市休甯所屬之屯溪等處甯國府
屬則宣城及所屬之潛江鎮池州府屬則銅陵及所屬之和悅洲太平府屬則當塗蕪湖及當塗所屬之
采石鎮廬州府屬則合肥巢縣鳳陽府屬則鳳陽懷遠宿州及宿州所屬之濉溪口潁州府屬則阜陽
州及阜陽所屬之泗溜集和州則本州及含山所屬之運漕鎮共二十七處 臣自惟竊下虛負 聖明惟
此端尙小補貧民生計之艱亦稍釋 臣心口素之愧因思我 國家以愛民爲家法休養生息儲極周詳
比年 恩詔頻頒仰見 軫念窮樵無時或釋惟此因利一法尙未有以上 聞者 臣不揣冒昧謹陳大
略上瀆 宸聽仰懇 天恩俯賜衡核倘可 特沛綸言通飭各省仿行其法俾貧弱之民有所依賴或
亦助 堯舜之仁於萬一 上諭陳彝奏縷陳因利局章程籲懇通行一摺據稱釐錢立局借給貧民限
日還本不復取息等語有無相通隨時轉貸本聽民間自便若必官爲經理流弊滋多如所稱用司事以
任收放稽核借必有保保必以鄰每日還本若干五日一還還清再借各節殊屬瑣屑不成政體且民間

得錢易於耗散而限不還勢必按戶追呼或重償鄰保不肯官吏因緣爲姦抑勒需索種種弊端斷難保其必無末聞青苗法貽害天下此奏立意與青苗稍異者係遵本而不取息然試思五日一還本之煩瑣拖累不較之穀熟取息爲更甚耶本欲利民適以擾民萬萬無此辦法所請著不准行○甲申前左副都御史薛福辰卒賞銀五百兩治喪○倪文蔚奏沁河漫溢查勘賑撫並將懷慶府知府等摘頂得旨知道了李芳卿等均著摘去頂戴飭令將漫口迅速堵合並查明災區委員撫卹○唐椿森奏竊維關帝神默相自來尊崇我朝尤昭靈貺凡與祭祀者先期齋戒則將事宜如何恪恭詎意奉行日久各衙門派出陪祀者諸多不到卽稽察監禮者亦屬寥寥本月初十日欽奉特旨遣鄭親王禮視鑾豆及監視鑾豆尙有數人並在百官東班糾儀見禮部祇多福一員陪祀殊覺不成事體相應請旨嚴加申斥庶屆祭祀之期不致仍前玩泄上諭御史唐椿森奏本月初十日致祭關帝廟陪祭稽察人員稀少據實糾參一摺祭祀大典理宜敬謹將事此項陪祭及稽察監禮各員到者寥寥實屬不成事體著各該衙門查取職名交部議處至是日係鄭親王凱奏行禮該御史摺內書寫鄭親王棟殊屬不合唐椿森著交部察議○乙酉予故晉安廬徐和道張保慈附祀前安徽巡撫英翰祠○丙戌張之洞奏嘉應等州被災籌辦工賑得旨知道了卽著將工賑事宜認真辦理毋任災黎失所○予故管帶湘軍慶字左營記

名總兵唐得勝照軍營立功後積勞病故例賜卹○張之洞奏斬犯藍亞進遭風覆舟將斃差不慎之屬
縣擬處並飭查該犯實在下落下刑部議奏○升泰奏藏印邊事奴才屢催赫政往復通詞從速辦理赫
政在獨脊嶺亦屢與英官熟商因候獲信彼族每多遷延茲赫政於六月初四日復由獨脊嶺馳來仁進
岡將近日與英官所議各節與奴才熟商據云彼族總以咱利之界不可稍移至哲孟雄與商上及駐藏
大臣平日有何稟禮似可照舊惟西金界內藏番不得有權如可照辦再當會商等語奴才查哲孟雄係
西藏外藩其土地向不在版圖之內該部辦理地方事宜於駐藏大臣西藏商上亦從不稟白前因藏番
自作不靖英兵已過春丕一經奴才委弁阻戰立即退還掠地保爾此舉殊為顧念邦交奴才因之迅速
到邊駐守印兵即不能任意思逞刻聞彼族如鳩蘭德等皆以保爾去年不能速得帕隘又復退還春丕
為失機每於印督及英廷媒孽其短是以保爾近頗遠嫌過有奴才公文到嶺保爾不敢拆封均以原封
轉送印督職是似信和延此赫政在彼屢次目擊今既據所議如此奴才已督同委員嚴防藏番照議辦
理一面將應議未盡事宜電呈總理衙門昨已承准回電以奴才所議尚無不合飭即從速妥籌商定了
結奴才已飭赫政於六月二十九日先行由營折回獨脊嶺與保爾妥籌一切趕緊會議定約惟刻下咱
利山南北皆因去歲用兵之後本年時疫流行藏界漢番官兵十病六七無藥無醫哲界印營染疾尤甚

歿者實繁有徒邊地氣候迴殊自二月以來無日不雨遍地泥淖晨起日出瘴濕薰蒸隨行官兵頗因此以致病而紆政往返縷緣絕嶠僕僕道途奔走於酷暑烈日之中出入於瘴雨蠻雲之內尤爲勞瘁不辭深資得力所有近日邊情合由五百里附片密陳得 旨覽奏具悉此次該大臣迅速赴邊挽回藏事深明機要紆政勤奮耐勞著先傳旨嘉獎該衙門知道○丁亥諭山東黃河本年伏汛盛漲章邱齊河等處河隄先後漫溢懷河各州縣村莊多被淹沒災區甚廣迭經諭令張曜賑撫恤賑交寒沍災民困苦情形尤深軫系著將該省本年新漕截留十萬石備賑隨漕輕齎等項一併按數扣支該撫卽飭所屬分別災區輕重妥爲散放務使實惠及民毋任吏胥舞弊用副加惠災黎至意○壬辰崧駿奏六月分海塘沙水情形下工部知之○予章邱縣捐賑命婦高艾氏旌表○癸巳諭本年夏秋間四川涪雅兩江漲溢近水州縣民間田廬被淹災區甚廣朝廷殊深軫念加恩著於該省捐輸項下賞撥銀五萬兩俾資賑濟卽著劉秉璋分給被災各處飭屬核實散放務期實惠及民毋任稍有弊混用副撫卹災黎至意○甲午諭黃彭年奏滬陳緝私積弊特參玩公溺職道員一摺蘇松等處鹽梟充斥本年七月間吳江縣地育有勘船摘去巡船殊屬不成事體緝私術引全在將領得人方足以資彈壓著照所奏由江蘇巡撫會同浙江巡撫酌委統兵大員兼統緝私一營隨時認真緝拿嚴行懲辦不得稍涉疏懈緝私道丁兆基於此次巡

船被擄未據稟報繳飭拿犯逾限未獲實屬玩公縱匪不知愧奮江蘇候補道丁兆基著卽行革職以示懲儆吳江縣知縣蔣一桂兼有緝捕之責防範不密亦難辭咎著卽撤任該部知道○乙未卹故徐州鎮總兵董鳳高○丙申 上詣 壽皇殿行禮○裕祿等奏鍾祥等縣河隄查勘輕重分別辦理報聞○丁酉 天壇祈年殿災○定安奏黑龍江官兵負道回旗由奉省挑募馬隊下部知之○崧駿黃彭年奏臣彭年奏緝私營勇搶鹽激忿致被鄉民燒斃多命謹將訊供大概情形先行陳明一摺於四月十六日奉 上諭黃彭年奏營勇搶鹽被燒斃命請將知縣及統帶等官分別懲處各摺片此案江蘇鹽捕營哨弁王永昌恃與哨官吳家正姻親膽敢率勇至奉賢縣紅廟地方搶劫鹽民張兆銓家門外鹽斤致鄉民激怒燒斃多命該弁勇等行同烏匪罔顧咎由自取而該鄉民等既將弁勇捕獲並不送官究治輒行致斃十四命之多實屬兇殘藐法此風斷不可長著該署撫嚴飭地方文武將滋事要犯勒限緝拿訊明懲辦奉賢縣知縣陳熊才著先行摘去頂戴統帶緝私營候補道丁兆基著摘去翎頂總領哨官候補遊擊吳家正著卽行革職以示懲儆至所稱明定緝私章程各節著會同該處妥籌辦理欽此當經恭錄移行籌商整頓之策旋據統帶緝私營候補道丁兆基就現辦情形酌擬章程札飭藩臬兩司覆核臣崧駿又飭運司參以商情推求不厭期衷一是查蘇省四府一州額銷浙引三十餘萬自頻年以來商人認引尙不

及三分之一緝私偶不得力卽此課引亦慮難銷足數臣松峻蘇撫兩年深知其弊勦徒私運向有大小之別其小販強半瀕海而處每藉煎鹽爲業浦東各縣多捆載出運不過數百十斤蓄據弁勇緝拿指爲土場者也其大幫動以數十百艘出沒於蘇松太三屬督緝從嚴則幫散稍懈則幫集其種類曰糧幫曰光蛋曰巢湖巢湖最悍光蛋糧幫時附麗以行衆指爲鳥匪者也臣等函囑往返擬令緝私一營力扼黃浦江使鳥船不得渡浦而西設遇偷渡並飭留防經制各水師協同剿捕但能懲創一二次則鳥黨自摧凡鹽在場地稽察官私賣之於鹽大使鹽課相離跟蹤捕賣之於緝私營使之各顧考成自能奉法惟謹要之營民不相仇怨則地方賴以安靖地方安靖則引銷之餉額可謀漸復矣該司等會議章程八條經臣等覆加確核尙屬妥協經此次定章以後緝私員弁能否愧奮遵守營規臣彭年仍當隨時察看不稍姑容至奉賢縣滋事案犯先後拿獲十一名除飭臬司督同局員趕緊研訊按例懲辦俾不法鄉民稍知儆畏外理合將籌議緣由並將章程八條恭繕清單會同兩江總督臣曾國荃恭摺具陳下戶部知之○戊戌賞普濟堂廣仁堂及蘆溝橋粥廠等米石○己亥奎潤等奏本月二十四日據天壇奉祀劉世印呈報是日申刻雷雨交作瞥見祈年殿圓額被雷擊落陡然火起刻卽仰知營汛五城水局去後等情前來臣等卽率同司員馳赴天壇會同營汛水局紳董竭力救護火已燎原無從措手祈年殿後

爲 皇乾殿係向來供奉 神牌之所惟時火已逼近深恐延及臣等當卽督飭司員率領奉祀等官並
營汛水局極力救護幸 神牌龍座及陳設一切均皆安妥並無搶護 祈年殿寶座八座祭器多件隨卽
撲滅 祈年殿餘燼並未延及他處訊據值班壇戶火起情由愈稱雷雨之際忽見 祈年殿前檐煙焰
烘騰卽時火起並無別故再四研詰堅執不移核與該奉祀呈報無異自係確實情形然該奉祀劉世印
職司典守究屬疏於防範咎實難辭除將該值班壇戶孫榮德魏連升王德海等由臣等咨交順天府自
行辦理外相應請 旨將該奉祀劉世印交部議處臣等亦有應得之咎請交部察議至延燒 祈年殿
一座應由臣等咨行工部辦理再是日火勢甚急全賴五城水會紳董等前往竭力救護實屬異常出力
所有五城水會十五處及紳董等可否由各該城自行請獎以示鼓勵理合恭摺具奏 上諭本月二十
四日雷雨交作 天壇祈年殿雷火延燒經官兵等救護撲滅本日據太常寺步軍統領衙門各奏火起
情形相同太常寺奏祀劉世印職司典守疏於防範實屬咎無可辭著交部議處太常寺堂官著一併交
部議處值班壇戶孫榮德魏連升王德海等均交順天府嚴行審訊有無別項情弊按例定擬具奏五城水
會紳董等救護出力著該巡城御史傳旨嘉獎火災示警朕心實畏災深惟有益加兢惕宵旰孜孜勵精
圖治爾內外大小臣工其各靖共自矢精白乃心力戒因循修明職業用副君臣交儆之意○壬寅夕

月於西郊○癸卯譚鈞培奏雲南府納樓等處土匪滋事登時撲滅請將出力之知府全楸續等獎敘得旨如所請行○是月荷蘭國使臣費果葆回國副使來因署理